

BULU' KUUPPA

Juma', 7 Januari 2005

SURA' KAREBA BASA KONJO

taung 1, lamoro 1

Pa'pau pa'tarimana Bupati

Bulukumba mange ri nipa'rie'na sura' kareba a'bicara Konjo, bungasa lanipalelena mange ri tau tabbalaya



Dame mange ri kau ngase' siurang pa'-kamasena Alla-taala na barakka'na pole.

Sukkurua na ku'puji mange ri Karaeng Alla-taala, nasaba' rie'ja tau a'ra' ampikkirii iareka na anjama-jamai nikuaya pa'bajuang sura' kareba a'bicara Konjo iamintu nubungasa nahajua Yayasan Bulu' Kuuppa. Na iaka isse' iami inni jama-jamaang hatang sukara'na nangnganre hattu na doi' na pikkirang sikua lohena.

Punna nipikki'-pikkirii sanna' sikiddina pantamakang doi' iareka sahala lanauppaya punna tala nikua paccei, mingka ia injo nikuaya pa'bajuang kahajikang toje' sukkarai, onjongpa isse' nikuaya la'sareki se're kahajikang mange ri sesena tau tabbalaya, poko'na injo nirekeng kabiasaan'na tau Konjoa (antama' to'i ada'a) ri Bulukumba.

Narie'mo pole tau maraeng tania tau batu ri singkampongta (Indonesia), la'sare sumbangang a'pabattu kareba mange ri tau tabbalaya na la'baju sura' kareba a'bicara Konjo. Na sikua lohena basa iareka ada' pada-padanna ri Bulukumba a'kulle nihaju kareba, mingka ri Bulukumba to'ji napile. Iami injo na nakke pammarenta ri Bulukumba a'tarima kasia sikua lohena.

Narie'mo inni pale' ambattuiki dalle', sanna' kukaa'rakinna inni jama-jamaanga bara' a'kullei a'sare silohe-lohenna kahajikang mange ri sesena kamponga/ pa'rasangenga na tau ammantanga ri lalangna, na sakulle-kullena a'sare pangngisse' mange ri tau pantarangangna Bulukumba angkua ia injo ri Bulukumba lohe pa'pakasannangang na pa'pakarannu-nyahaang a'kulle nibattui, pada nirekeng Kassi' Pute ri Tanjung Bira na Pa'bajuang Lopi ri Tana Beru na Tana Toa Kajang Le'leng na Koko Gattaya nusilaranga na lohe pole buangangna. Ri Bulukumba lohe siloheang ka injo Bulukumba nisarei pa'kalumannyangang ri Puang Alla-taala, lohe cengke na kopi na panili na pare na sikua buangangna juku' ri tamparangna nularaya a'kulleki a'baju pammiaraang juku' sunu balaho na napoleong na doang, na lohe to'i pangngempangna. Iareka a'ra'ki a'modala ri maraengangna jama-jamaang, nalohemo tau naupa'ki su'runng kamunnina.

Iami injo na rie'namo inni **Sura' Kareba Bulu' Kuuppa** a'bicara Konjo, maemaki massing ampakahaji'i tannangta na ki'sare kareba, tau maccana Bulukumba (panritaya) na pammarentaya na gurua na tau nipa'taua sikuaya buangangna, mae ngase'ki a'sare kareba

nuhaji'a mange ri sesena kahajikangta ngase'.

Na kupammarimi inni pau-paungku na ku'sare haji' tarima kasi mange ri iangase'na tau ampikkiria iareka tau a'kahajuanga mange ri kahajikangna Bulukumba bungasa'na Yayasan Bulu' Kuuppa. Salama'ki anjamai inni jama-jamaanga. Rupa'na sangnging nisarejaki kagassangang na kasagenaang.

BUPATI BULUKUMBA
H.A. PATABAI PABOKORI

dem meq R kY qes Sφrq
pkmesn al-tal n brkn
poel .

i > a n • tJ meq R krea q
al t l , nsb Reaj t Y ar
aPKRA Aaerk n aj mj mA
N• ay pb—aq jr ker b
aBcr Kj o AaMS (E†qs
nh—a yys †œ • φp.

Nak Aes AaM AN j m-
j maqhtq' j krn nqer hŠ
n doA n PKrq' S• a l oehn.

†n NPK-PKRA sn SKDn
ptmkq doA Aaerk shl
lnφpy †n tl N• a
peCA, Mqk Aa Aj o N• ay
pb—aq khJ kq t oej j kRA,
aoj oqpes N• ay l ser K eser
khJ kq meq R esesn t Y
t bl y , pokon Aj o Nerekq
kBasn t Y koj oa R †œ • b.

Na Rea mo poel t Y mreang
t Na t Y bŠ R Skfoqt ,
l ser j bqq apbŠ ker b meq
R t Y t bl y n l b—j r ker b
aBcr koj o. Na S• a l oehn
bs Aaerk ad pd-pdn R
†œ • b a • el Nh—ker b, Mx
R †œ • b toJ nPel . AaM
Anj o n nek pmert atRm
kSa S• a l oehn. ...

AaM Aj o n Reanmo AN
j r ker b †œ • φp aBcr
Ka oj o, mea mK mSq afk-
hJA tnq't n Kser ker b,
t Y mcn †œ • b (pZ ty)
n pmerty n f > a n t Y
Npt Ya S• ay †aqn, mea
qesK a ser ker b (EhJ a meq
R esesn khJ kt qes'.

n • pmRM AN pY-pY • n
• ser hJ tRm kS meq R
Aa qesn t Y aFKRA Aaerk
t Y akh—aq meq R khJ kn
†œ • b †qsn yys †œ • φp.
Sa l mK aj mA AN j m-j mq.
> pn sQq Nserj K kgSqq n
ksegnq. p †pT pt bW

Tupa'sapu le'leng batu ri Kajang ammangeii kantoro pammarenta ri Mangkasara

Aggenna kunni-kunni palakara gattaya ri Bulukumba tala rie'pa katappukangna. Pinsikurangangmi tau Kajanga mange ri Mangkasara ri kantoro gubernur na kantoro DPRD propinsi angngera katappukang palakara tana nunalamungia gatta PT Lonsum.

Allonna salasa tanggala 14 Desember 2004 sikura oto tere' tau Kajang ammakeang le'leng ammangeii kantoro pammarenta lasiitte Amin Syam. A'ra'na tuKajanga lanapauangi angkua anre'pa nangnguppa nunaminasai ri sesena ballinna tanana. Rua passala naera tuKajanga iamintu nisambeang tanana iareka PT Lonsum ansalaih Bulukumba. Ka nakua tuKajanga, injo PT Lonsum rie'mi ruang pulo taung labbi narampo' rajja'a ri Kajang.

Labbi sijang kunjo mange a'gora-gora tu'pa'sapua aggenna amminro ngase' na anre' manna se're tau antarimai batu ri kantoro pammarenta.

Punna nilangngerei kasabbiangna tau lanri rajja'na Kajang pangngare'na nirampo'i ri PT Lonsum. Saba'na nangkua kamua injo ka biasana tana luara nalamungi batara iareka bue nangngassele a'tong-tongang.

Naia pangngakuangna lanri PT Lonsum injo tana napa'lamungia gatta na napa'paentengia pabere anunna bede' pammarenta na rie' bede' sura' nipabbiang (ijin) sikurang pulo taung allalloa. Nampa pole maengmi bede' PT Lonsum ampainroangi rajja'a sikurang bilangang iareka a'sabbu hetto tanana rajja'a.

Injo haji' toje' ka anre'mo nasusaii pammarenta langngera ongkoso pa'pakahajikang tallasa. Mingka anre' napikkirii angkua nukaminang haji'a kedde' ri tallasaya iamintu nipikkiri nurie'a pa'sahalang ri pimbali tau. Na talia kalea nipikkiri mingka kipikkiri ri sesena tau tabbala lampakahaji'i tallasaya.

Lanri PT Lonsum a'sabbui tau Bulukumba napajama kunjo antallasii na bijanna pole. Punna anre' nipaenteng panjamaang anre' ki'kulle a'tallasa. Manna rie' batara'ta punna anre' pabere anghallii anre' kimmuntulu doi' pajama kokoa. Kamua to'mi injo lanri pabere, punna anre' batara tala jari' rie' nipabere. Nupoko'a kapang mae nipikkirii nukaminang haji'a iamintu nu'kullea sipasahali lanri rajja'a na lanri PT Lonsum todo'.

Punna nipasimpadaii kariekangna PT Lonsum na kaparalluangna rajja'a maka anterea hattalang punna anre' nagaukangi pammarenta. Ebara'na PT Lonsum a'lampa batu ri Bulukumba sikurang sabbu tau Bulukumba katanrengang pangnguppaang? Antere' to' pakua pangnguppaang pammarenta?

Rie' pa'pau angkua a'kaloroi bokoa na ribokoi sassa' lalanga. Inni pole kinahanahai. Maka a'kullei rajja'a butu' kagau'-gau' a'lampa ri kantoro pammarenta punna anre' tau angkompai?

Rie'pa ta'tora' biasa nampa kisassala kalenta pitigau'-gau', mingka ta'bulu'mi. Mae pada a'pikkiriki nuluara na lantang. Jako na kaparalluang tau sitau mingka nuparallua kaparalluang tau tabbala. MKS



Kamateang Sikalabini

Rie' kampong arengna Basokeng ri biring tamparanga ri Dwi Tiro, BontoTiro. Tusikalabini bahinenna arengna Cayati, buru'nenna arengna Muh. Basran, nuberu batu ri Makka. Nampami tallung allo allantena ri balla' batu ri Makka na nakatappusi nyaha. Kamateangna Cayati ri allonna Juma' tette' sampulo ri ele'na iamintu natabai garring nunikua katimboang lalang. Naileiji dottoro mingka tala a'kullemi napammari. Iami injo garringna saggenna angngurangi Cayati nakatappusi nyaha.

Buru'nenna Muh. Basran ri hattunna niunjuru bahinenna rie' paunna ri tau tabbalaya nakua: "Aki rolo' angkakii bahinengku, kitajanga." Iami injo ansabakii tau ratea ri balla' alannasa namassing a'kuta'ngang lalang nyahana, angngurai narie' paunna buru'nenna ri hattunna lanierang a'lampa nikahangang.

Sanggenna ammannyangmo taua, nammentengmo buru'nenna amange ri bahinenna anghau'i possi'na. Maingnapa injo nampami napabbiang taua angngurangi bahinenna annimporong ri balla' nitarrusang mange ri kuburua.

Narapi'i hattu pa'sambajang subu, ri maengnamo a'sambajang buru'nenna antama'mi ri pa'tinroangna, na nakeo'mi kamanakangna siurang arinna mange ri ampi'na na nakuamo: "Kunni-kunnina nakke lakupinahangi bahinengku nasaba' ta'bulu' maingma sijanji labbi riolo rate ri butta lompoa."

Ammarangmi kamanakangna na nakeo' ngase'mi sibija. Anre'mo pole maraeng napau nubattu ri kalenna maraengangna "Hailaha Ulallah," saggenna nakatappusimo nyaha.

St. Haena na Supandi
Hila-hila, BontoTiro

Apa inni niare' sura' kareba Bulu' Kuuppa?

Limang pulo taung riolo, manna rioloangna hattu Nippong na Balanda, gitte tau Konjo sikiddijaki. Mingka kunni-kunnina tabbalamaki, na taliajaki tabbala kunre mae ri tana Konjo. Rie' pole siloheang ri sikuntuta ammantang-mantangmi ri Mangkasara, rie' todo' tau a'lampa ri Kolaka na ri Kalimantang na ri Malaysia na ri maraengangnaya pole.

Pila' ta'talasaki, pila' ta'bage-bage kisa'ring, talia gara-gara maengki a'besere, mingka gara-gara sukkara'na angngurang bicara ka sikalereiki. Ebara'na rie' rua sikalabini, manna sampulo ana'na, suangi a'ra' naisse' apa massing nahaju na ante'i mae ajangna iareka ana'na. Mingka punna rie'mo ampu, ampu riha na ampu kulantu', onjongpa isse' ampu to'ro, lanikurami pale'? Antere'mo pakua ri sesena sampo pinruang na pintallung na pingngappa' pole? Manna rie' tau sippa'na sombere, kulle kapang tala ganna' a'pulo-pulo urangna. Antere'mo pakua ri seseta tau Konjo a'kulle sipa'bicara, manna siitteji, ka loheta kamunnina a'bilangangmaki sabbu kapang.

Kaporeangna ada'ta a'kulle mulai lannya'. Kakaddorang kampong kurang. Manna kakaddorangna pasibijaeng ta'kariri'mi. Apa saba'na? Gitte massing a'tangngaengki a'boja katallasang. Ma'nassa paralluki angnganre. Na punta massing a'boja doi', inaimo angkatutuii ada'a? Inaimo anjagaii pa'se'reang kamponga? Inaimo a'kulle angngitte lerei nulanjaria sallo' sollanna ri taung ri bokopi iareka sampulo taung nidallekanga na kimmuntulu ngase' pa'sahalang?

Injo se're pa'sabakeng na lambua' sura' kareba basa Konjo. Iamintu sollanna a'kulleki sipammuntulang nuhajikanga ri allo ri boko. Punna rie' pasilalongang numbalai ngase'ki, hajikang kiisse'. Onjongpa isse' punna rie' annorang ansulu' battu ri balaya injo. Haji' kisa'ring punta angngisse'i.

Punna ambacaki ri sesena kampong maraeng ri antere'-tere' battu ri bo'-bo' sajara, a'nassami angkua kampong nummuntulua kahajikang, manna kampong lompo manna pole kampong caddi, iami **nusipa'lampaang ri dallekanga na ammile niare' haji'**. Ruaruana injo a'ra'ki kupa'nassaang sikiddi.

1. Sipa'lampaang ri dallekang: Punna rie' tau a'ra' a'limbang ri kampong lerea,

hajikangi tabbala tau a'rurung. Punna rie'mo sitau a'ra' a'bise la'lampa lere, pa'tujungna kulle kapang niare' haji'. Mingka a'nassami pa'dibokoangna kurang na nibetamo a'ra'na. Nasaba' punna a'bisei siallo bujuru, kulle kapang lanierangi amminro ri anginga punna mangngangmi iareka ta'tinroi sinampe'. Mingka punna rie' tallu tau a'limbang, a'kullei a'lebba'-lebbasa a'bise alleangna pa'lampaingna anjari lere toje'. Labbipa isse' punta se're kampong. Sampang a'samaturu'ki a'lampa ri dallekang, lerei pa'lampaingta.

Kunni-kunni anre' napa'pada riolo. Hattu riolo rie' tana na kurang tau na lohe kasampangang. Riolo manna sitau a'kulleji nasalai bijanna, nampa antama' ri boronga na annabbang, nampa angnguppa koko iareka galung. Sitaung maengna injo nanjarimo turie'-rie', assalang anjama sarringi. Kamunnina anre'mo nalomo. Apa anjari alleangna anre'mo napada riolo? Maka salai Allataala lanri sikiddina tana napa'jariangki? A'nassami anre'. Iareka maka gittemi sala lanri lohe ba'lalona tuhusengta? Manna anterea pa'pihali nusirattanga, karekang kurang tana na lohe tau anre' kale napolo'-polongangi kasampangangta. Nubiasaya ampakaseppangi taua, iamintu punna a'tallasai kale-kalenna. Apa saba'na? Ka pila' lohe tau a'samaturu' anjama, pila' balloi katallasangna.

Inni se're pa'pa'tuju kapang: Kuddeka rie' ri sikuntuta a'lampa naung ri Mangkasara na anre' kale pasisambungangna na tau maraeng. Nukaminang kasino-sino iamintu punta a'dakka. Assalang rie' bokongta, kulle kapang lanteki naung ri Mangkasara na salama'. Iareka kuddeka a'lampa naungki ri Mangkasara na ki'dongko' bendi na siajoa tedong kipake. Punna pakunjo bateta, rupa'na anre' napeso' tedongta ri tingang lanteta. Mingka punna a'ra'ki a'lampa naung ri Mangkasara na ita' lante na lomo pole, hajikangi a'dongko' oto seha. Punna oto seha kidongkoki ammanjengki ri lohe tau iamintu: ri sopiri na ri pabalu' bensing na ri pata pangnganreang todo'.

Iami injo na kiare' haji' punna a'lampaki ri dallekang a'rurung-rurung.

2. Pammile nuniare' haji': Punna a'naha-nahaki, anre' na'nassa apa lanjari ri boko, manna ammukona. Mannaki

massing a'ra' ammontulu kahajikang, anre' na'tantu haji' nulakipisa'ringia. Rie' se're pa'pangngajara angkua amangki punna lohe ampangngajariki. Nasaba' pakunni: kulle kapang tala rie' tau a'tungka ammile nukodi, mingka situju-angnaji nammuntulu kodi. Na injo nukodia biasa battu ri pammilena to'ji. Gara-gara injomi na hajikangi a'samaturu' a'lampa ri dallekang sollanta a'tarrusu sipainga' na sipangngajari ri sesena iangase' palakara. Sibalekangna, kulle kapang nukalekalennayaji lomo niboce, mingka punna tabbalaki sukkarai nipa'lampa-salai.

Na inni pole: a'nassami katallasang haji'na tau tabbalaya, a'kulle to'i napumanakiang ta'se'rea tau. Sibalekangna na anre' na'nassa: katallasang haji'na tau sitau anre' na'kulle lante kale-kale ri paranna. Suang anre'. Battuangna injo, punna sipa'dakkaangki ri dallekang na kisitunrangi, ammontulu ngase'ki haji', manna tau nuanre' kalea na'kulle (iareka nuandaya) a'geo' kale-kalenna.

Iami injo na sura' kareba **Bulu' Kuuppa** nipa'rie'. Ri sesena arengna, pakunni pa'nassaangna. Rua saba' sintoje'na. Nubungasaya a'nassa iamintu rie' pasimpadaangna kabupateng Bulukumba na areng sura' karebata. Numaka ruana iamintu gitte tau Konjo suang angngittei Bulu' Bahokaraeng kunjo ri kasa'rangallo alleangta a'kulle angkua: "Bulu' kuitte." Mingka battu ri sikuntuta tau Konjo nusibilang sabbu kulle kapang rie' a'bilangangji tau maeng antangai a'genna bahonna lapung bulu'. Injo tau sikiddia a'kullei angkua: "Bulu' kuuppa." Kasabbiangna tau angnguppaya tala simpadai anunna tau nungngittea.

Iami injo na nipilei areng **Bulu' Kuuppa**. Sollanna kasabbiangta, pabaca sura' kareba inni, a'kullei balloang na hajikang na luarang na lantangang ri boko mae naia nukamunnia. A'ra'ku ngase' ri **Bulu' Kuuppa** iamintu amboneangki sura' karebaya inni na ukirang nuhaji'a ri seseta ngase'.

Pa'tujungna **Yayasang Bulu' Kuuppa** napanjariki ngase' ampupatai sura' karebaya inni. Ilalang sikurang bulang nidallekanga inni a'ra'ku a'geo' langgaukangi sura' karebaya alleangna taliaji nipau mingka a'botti toje'mi: **battu ri tau Konjo assala'na na nihaju ri tau Konjo to'ji bonena na mange ri tau Konjo pa'tujungna**.

Kacamatang tau Konjo

Rie' bede' tau Konjo ammantang ri iangase' kacamatang ri sibatuna kabupateng Bulukumba. Ri karua kacamatang bede' na sangga lohena. Manna kamua injo, sura' kabara **Bulu' Kuuppa** rie' appa'ji kacamatang pasisambungangna ri nubungasaya inni. Kacamatang nuni-kuanganga iamintu Bonto Bahari na Bonto Tiro na Herlang na Kajang. Battu kunjomaki a'boja kareba na battu kunjo to'mi kabattuang pa'pasirang ri sesena tau nianakang na tau a'nikka na tau mate pole, na kunjo to'mi pole nierang sura' karebaya nipa'taha-tahaang.

A'ra'na Yayasang **Bulu' Kuuppa** pila' luarai najampai sanggenna iangase' tau Konjo ri sibatuna Bulukumba a'kullei nakambiang sura' karebaya inni. Sabbaramaki rolo' sinampe' tau kunjoa mange iareka kipasiisse'a ri pa'cama'ta.

Mange ri jannanga:

A'biringmi ruang taung kulangngere angkua lare' sura' kareba na basa Konjo. Mangngang kusa'ring a'tajang. Kipa'rupa sai pa'tujungta na hebbere.

Pabaca nampa,
Ali ri Ere Dabung

Sura'battu ri pabacaya

Rie' kasampangang ri sesena tau nua'ra'a ampalantei pangnguppana, batena iamintu a'bajui sura' mange ri sura' kabara **Bulu' Kuuppa** nu'kullea nipantama' ri ukiranga arengna: "Battu ri pabacaya." Ninanromi ri kantoro cama'ta.

Mange todo' ri tau nulohea pikkirangna iareka nalantang, rie' kasampangangna anjari paukiri, batena iamintu a'bajui karangang sikali ilalangna tuju allo.



Pa'pau nusirattanga?

redaksi	jannang kareba
editor	jannang panrala
percetakan	pammanralang
dicetak	nipanrala
ruangan/rubrik	latta/bili'

Sura' kareba Bulu' Kuuppa
Tu'bacaya tungngukiri'na
todo' pole

Kingai tappu-tappu sipalang? (Kulle-angmaki a'baju pakunjo kedde'.) Kingai carita riolo? Sirattang punna rie' sajara kamponga? Kingai pa'nassaang a'baju dumpi? Ako kareba tau matea? Apa pole?

Apa-apaji pangnguppata, kipauang saa. Hajikangi sura' kareba **Bulu' Kuuppa** numaka ruaya sallo' naia nukunnia, assalang kipa'nassaanga nukingaia na nutala kingaia.

Angngura kisa'ring?

Angngura kisa'ring ambacai nukikambiangai ri limanta kunni-kunni? Rannuki iareka anre'? Numakkalaki iareka kingngarrang? Ta'rui' kisa'ring iareka ta'duddu'? A'ra'ki tarrusu a'bacai iareka ganna'mi sikali inni?

Manna apa-apa pikkirangta, ma'nassa sura' karebaya inni a'kulle nipinra nipakahajiki. Kipauang saa pikkirangta! Apa nukingaia baca? A'kulle nitambai! Apa nukilandaya baca? Punna lohe tau sipangnguppa, nipammarii kedde'.

Rie' harupu' sukkara nibaca? Anterea? Ri sesena harupu' lontara, nitambai iareka nikurangi?

Patanggong:

Benedict Andrey Dicky Salindeho
Yayasang Bulu' Kuuppa
Kotak Pos 1419
Makassar 90014

Pammanralang:

CV Adi Perkasa
Jalan Talasalapang
Ruko BPH Blok 0-1 No.B
Makassar 90022

Kelong Sura' Karebaku

A'taungna inni a'kinara

Anghoja-hojai belaku

Lanri a'ra'ku

Siitte-siitte a'bicara

Mallingmi kuantalai

Kuera ri Alla-taala

A'rappung a'bicara

A'baju sura' kareba

Sura' kareba Bulu' Kuuppa

Sura' a'bicara Konjo

Balloi kapang

Nisambung na nipanjar

Ammuko membara narie'

Cari'-carita kareba haji'

Ballo nikiring

Nipanrala ri sura' kareba

M. Bakri Akhmad, Hila-hila 3/2004

Tau anggoje'


*Kunni-kunni labbi 1000 nu'nas-saya paoje' ri Bulukumba. Punna nirekengi tau anggoje'a, manna rie' pulo sabbu, mingka lohe tau oje' anre' sura'na.

*Ballo rie' tau anggoje' ri desaya. Punna angnguppai bala tala angnguraji ri sesena tau rie'a sura' oje'na ka rie' atorangna pulisia. Ri hattunna ammulai angngalle sura' oje', mulaimi a'banyara sura' kacilakaang, punna angnguppai bala niongosii.

*Rie' haji'na rie' kodina tau nioje'a: Lohe tau angkua: "Haji' oje'a, punna a'kulle minto'ji antama' oje'a napalanteki ri ampi' balla'a. Ita'ki allante manna rie' apa-apanta nalurangimaki."

*Lohe todo' tau amalla' aoje'. Ita' angnguppa bala, ita' todo' angnguppa garring battu ri anging, hambang, bosi. Ongkoso'na biasa sirattangji, biasa sisabbu ri otoa, ri oje'a lappi ruanna, ta'rua sabbu.

*Biasa anre' nasirattang lohena nauppaya paoje' na otoa. Biasa ta'sampulo labbi nauppa amminro-inroi Kajang na Tanete. Lohe todo' sopiri pete'-pete' angkua: "Loheang-angi nauppa paoje'a na nakke sopiria." MegaDia' KJ 2/04



Ri maengnamo PAMMILU

Sanna' roa'na hattu kampanye ri anre'pa PAMMILU. Ri narapi'mi hattuna se're paratai lohenamo arappunga tau lohemi na gambara ulunna parataina a'lampa marang-marang: "Tallasai XXX, tojjo'i antama' tangngana. Nasaba' iami inni taunna a'ra'i natahangang katallasangna rajja'a ri butta Kajang, Herlang na Bontotiro."

Mallingi rolo' ri lapanganga ammarang-marang nampa pungkahana angkuai: "Tallasai XXX, ako alleseki ri gambara'na XXX. Hojai taunna nu'kullea ampasilolongangko katallasangnu."

Ri maengnamo ammarang-marang napau-mi ri tau tabbalaya angkua: "Sinampe' punna nialalai kunni mae niatoro haji'-haji' pa'lampaangna, ka lohe bala ri annorangna." Iami ri maengna a'pau pakua injo ansulu' ta'se're-se'remi motoro niparioloi ri pulisi. Nasaremo isse' pulisia pa'painga': "Ati-atiko, ako rieki allaloia."

Mingka tala najampaiji pole, nahalu-halu to'ji siondang-ondang ana'-ana', na sikalinna a'lampamii, ammarang-marangmi ri annoranga tarrusumi a'gora-gora taunna sarringmii. Sanna' rannuna amminahang ana'-ana', manna sintoje'na anre' nasanna' tungkulu paratai injo.

Mallingna hattu kampanye allo-allo kamuami injo. Arupung tabbala tau siurang motoro, oto nunibelo-beloi gambara ulunna paratai, nampa a'lampa mange-mange marang-marang na siondang-ondang. Sanggenna rie' sikuntu loko' ri motoro'na silappo iareka a'dabbung. Rie' loko'-loko'ji, rie' todo' nusanna' loko'na.

Biasa rie' tau angkua ri sibatuna Indonesia, "Punna anre' na'kulle angngatoro kampanye, ante' pakua na'kulle angngatoro nunamarentaya punna ia nipile?" Lohe tau maraeng angkua ri sesena kampanye, "Napela'-pela' doi' siloheang. Hajikang napake doi' injo antulungi rajja'a."

Lohe janjinna pungkahaya ri kampanyena, na kunni-kunnina lohe kasaheangna ampa'piitang taunna batena ampasilolong-angi katallasangna tau tabbalaya situru' janjinna. Haji' punna nau'rangi pasang-pasang Amma toa ri sesena pammarentaang. Muh. Satria, Herlang na urangna pole.

Lohe kajariang silappo



Sinungka'na lohe oje' ri tana Konjo na lohe todo' tupata motoro, sangnging rie' nikua kacilakaang. Ebara'na ri allonna sanneng tanggala 18 Oktober 2004 ri tette' karua ri ele'a na silappo motoro Smash kabattu'ngna battu ri panggolo Tanete na nungngerangai tau Sangkala na motoro Supra Fit kabattu'ngna battu ri pasara Kalimporo na nungngerangai niare' iIrdan (Toto), tau Jampang desa Tambangang. Naia isse' taunna pa'pada-pada aloko' na pada to'ji apanra' motoro'na.

Pangngare'na sabbi tungngittea nakua: "Injo rie' oto pete'-pete' battu raja mae ri Tanete na'patimporong lurang ri Jampang, anjariang injo motoro Smasha, tappa' naalle to'i annoranga ri kanang nasaba' pangngare'na a'ra'i nalimbang iareka napabettai injo otoa. Mingka rie' to'mi motoro Supra Fita battu lau' mae. Anjariang silappomi motoro battu lau'a na motoro battu rajaya. Injo motoro Smasha nubattua ri Sangkala a'tanggong lampaka-hajikii injo motoro Supra Fita pole. Nasaba' naare'i kalenna mintodo' asala."

Ri allonna rabai tanggala 20 ri tette' tuju ri ele'a na silappo para motoro Vega na motoro Smash. Nungngeranga Vegaya niare' iBiling, amuru'na ruang pulo taung. Na'gandeng pole bahine, pada-pada ammantang ri Ganta' desa Bonto Biraeng.

Pasang ri Amma Toa Kajang

Ikau karaeng siurang ada'a Pakahaji'i jari-jarina, Nasaba' tuhusengnu bajung karaeng bajung ada'; Nasaba' punna salai jari-jarinu Iareka rie' pauangna nanjari pammarenta, Ammanraki tau tabbala; Tangnga nakajariang areng pole.

Nakua pole pasanga ri Kajang: Ikau ada'a, ikau karaenga, lambusu bu'runsko, Pa'la'langangna angkuaya, Battunna pammarentaya parallui alambusu. Jari punna rie' pammarenta beru nipile Namaingmo nilanti', manna kamua mamoo; Punna nakajariangjako tinanang, Napanakarangjako juku', Napammattikangjako tua', Na pa'lo'lorangjako ere, A'baijako ri barumbung; Mingka punna tangnga nakajariangko, Pettai kalennu, kamaseang kulantu'nu, Ka bola-bola pa'lettekang.

Naia pammarentaya Parallui napakahaji' ngase' taunna, Punna anre' nakullei a'pakahaji', Nipalettei ri tau maraenga nu'kullea. Jari parallui a'patantang prinsip angkuai: Sabbarako nu'piso'na nipainroko mange ri batenu.

Pammileang Kapala Desa ri taung 2004

Iangase' tau angngisse'i ri sesena pammileang pammarenta ri taung 2004, taniaji pammileang taunna DPRD, nusanna' roa' ri tana Konjo, mingka ia todo' pammileang presideng Indonesia beru numpa'dabbungi tumallinga ammentara. Iangase' injo nipile ri rajja'a, mingka a'kulle nikuaya nunahajua pammarenta nulerea battu ri kampong-kampong anre' nasanna' ampakata'kariri' i tau Konjo allo-allo. Nunapisa'ringia tau Konjo allo-allo iamintu panggaugangna desana. Biringmi limang pulo desa ri appa' kacamatang ri tana Konjo, na limaji desa nisambe ri taung 2004. Siloheangna kapala desa ri tana Konjo anjama tarrusu na anre'pa narapi' hattuna nanisambe. Se'reji cama' nisambe ri taung 2004, iamintu ri **Bonto Tiro**. Abdul Rahman cama' beruna

Naia motoro Smasha nungngeranga nikua iBaha', amuru'na kurang labbia tallung pulo antuju taung, ammantang ri Sengka Tallu desa Bonto Baji'.

Pangngare'na tau sabbi pangngittea iamintu iVank: "Injo motoro ruaya pada-pada'ki kabattu'ngna, iangase' battu ri panggolo Tanete. Mingka injo Smasha tappa' allekkoi motoro'na antama', sanggenna injo motoro Vegaya tappa' nalappo to'mi battu ri boko, alleang pada anrabba."

Rua-ruana motoro pada panra' ngase', na iajia injo gandegangna iBiling, iamintu bahinea, ta'salai giginna ruang papp'a.

Rie' pangnguppuna tau angkua lohena pangngerang motoro kurang kaati-ati, andana tunru' ri atorangna pulisia. Injo tu'motoro biasa naisse'i atorang mingka nangai to'i angngerang pammehaang iareka kabattakang.

Pasilappoang nungngeranga sitau tumate iamintu ta'kulingi ri Pa'tingkaseng Jawi-Jawi na Balambassi. Injo alloa sattu tanggala 23 Oktober 2004 ri tette' lima ri subua, na sopiri'na niare' iUto', amuru'na pa'kapang rie'mi ruang pulo ansalapang taung, ammantang ri Sengka Tallu desa Bonto Baji'.

Na injo motoro, motoro SupraX nungngerangai nikua iJafar, amuru'na tangnga sala to'i labbia ri ruang pulo taung, ammantang ri Padang-Padang Tana Jaya.

Injo otoa kabattu'ngna battu ri Kassi' Kajang na'lurang juku' lamange ri Pasara Bakeru. Mingka nakamasseang nyaha nasaba' iangase' nunaparinaha-nahaya, a'giling amminro anjari kacilakaang.

Naia to' injo motoro, pangngare'na taua angkua battu ri Palampang, mingka injo na

Jari punna pammarentaya Anre'mo nakullei naatoro taunna, Nakua pasanga ri Kajang angkuaya: Punna a'danggangmo pammarenta, Panra'mi intu lamung-lamunga, Punna panra'mo lamung-lamunga, Kabiloangmi [bangkuru'] pammarentaya; Punna kabiloangmi pammarentaya, Ruttungmi intu pa'rasangenga.

Iami injo napa'ralu taua sipainga' Mange ri kahajikanga ri paranta tau, Nakua pasanga ri Kajang, angkuaya: Nasekko' pau nesko pÿ A'bulu sipappa' a ð l o Sp p A'lemo sibusu a e l m o S b Š Tallang sipahua' t l q Sp a w Manyu' siparampe m ~ Sp r e p Lingu sipainga' L , Sp A q Mate siroko' met S r o k o

Angngu'rangi mange ri tau Rie' a'ra'na, Nililiang sikuntu pa'pisangka'na tuma'buttaya Sallu ri ajoa Ammulu ri adahang Lambusui kigattang Nigaukang sikuntuna a'ra' Pa'suroangna pammarentata. Syamsir, Makassar

subu amminro nasaba' pa'tujungna lantama' ri Kassi' iamintu jamaangna ri Koperasi Pannanroang Pangnginrangang. Mingka apaji kajariangna, anre' maraeng angkua nasalai bahinenna, tau toana siurang bija-bijannaya na ri sikuntuna urang-urangnaya.

Na injo pa'tappukang nyahana, asampangji allante rolo' ri balla' garringa, nanampa bakkena nierangi mange ri balla' tau toana iamintu ri Kassi' Kajang.

Na rie' pole lurangna injo otoa num-mantanga a'cidong ri dallekang, aloko' sanna' to'i, nanilariang todo' mange ri balla' garringa, mingka Alhamdulillah, nasaba' sampangji nitulung nyahana.

Iajia kapanrakangna otoa a'lappoi antama' ulunna, mingka ladda'pa isse' motoro nasaba' aancuru minto'i iangase' palasti' pa'bungkusu'na.

Manna tu'motoro sala, punna oto nabali nassa to'ji otoa niare' sala, ka ia lombo. Rugi iangase'na punna anre' natunru' ri atorangna a'padakka oto iareka motoro. Tu'motoro anre'mo, tu'otoa cilaka todo' lanri lurangna loko', tu'pata oto sanna' rugi lanri ia lambanyara ri sesena iangase'.

Punna doi'ji karugiangna taua, niare'i hattala, mingka punna anre'mo taunna rugi toje' nutala nikullea ansambei.

Allo-allo rie' kareba ri sesena tau alloko' gara-gara silappo motoro. Biasa tung-ngerangai motoro anre' SIMna na biasa todo' anre' doi'na nulapabanyara ri pa'paka-hajikangna motoro iareka ri ongkoso'na balla' garringa iareka sambe-rugina. Punna ana'-anakiji nassami tutoana parallu a'boja doi' ambanyara sollanna anre' nanitarungku ana'na.

Ante' pakua na ki'kulle patappu'i pasilalongang oje'/pamotoro nupila' allo pila' lohe kajariang kodi? Apa pangnguppata? Apa lakihaju? Nursalam KJ

Telepong ☎

Ammulaimi nijama nipantama' telepong samaraya ri tana Herlang, Kajang, na ri kampong maraengangna pole. Rie' se're kaupakangta ri sikuntuta taua. Punna rie' pepa' lanipau ri bijanta, ri anrongta, russana'ta, na ri urangta, anre'mo na gitte kunjungi mange ri balla'na, anre' to'mo tau lanisuro a'pasilante bicara angngerang pasang. Biasa dedde' kulantu', na inni massing rie'mo niballaki na a'kulle tau sisambung sa'ra tau lerea ngase'.

Mingka rie' todo' kakurangangna, iamintu iangase'na gitte to'ji banyara, manna talia gitte ampake. Punna ana'ta ampake sobbui telepong naurang bicara purinanna ri Jakarta biasa anre' nataru'rangi na ita'i nirapi' sibilangang sabbu rupia ongkoso'na. Gara-gara injo lohe tau andai ampantama' telepong ri balla'na; napake mamii telepong samaraya. Mega KJ

nisambe. Salam nipile ri rajja'a anjari kapala desa beru ri desana Amma Toa. A'nassami hattala jamaangna kapala desa beru lantaran ruaiji Amma Toa na anre'pa nipatappu'i palakarana.

Ammari sinampe' M. Arsyad Patawari S.E. ammentara ri Malleleng gara-gara a'ra'i anjari anggota DPRD. Anre' nata'pile parataina, iami injo na anjari isse'i desa Malleleng. Kaitteangna ningai ri rajja' kunjoa mange.

Ri desa Pantama kapala desa mallinga ta'pile poleangi anjari kapala desa beru, iamintu M. Ali dg Tojeng Spd. Ia kapala desa riolo, mingka a'ra'i amhari, nampa sampo sikalinna nipile ansambe. Annang bulang ri maengna anjari kapala desa berua amhari todo', na M. Ali dg Tojeng nipile poleang.

Manna kapala desa beru, manna nu-mallingamo, nikellai ngase'i anjampai haji'-haji' kaparalluangna rajja'na.

Jannang kareba na sikuntu kantoro cama'

Kagassingangna Kalenta

Igitte rupa taua paralluki sangnging anghojai a'rungang kagassinganga iareka a'kulleangki alere battu ri kagarringanga. Tala rie' kapang se're tau a'ra' agarring iareka adodong. Tau ma'pa'rasangenga ri Kajang loheji anre'pa nata'atoro katallasang-na sanggenna biasaijaki nataba garring.

Hattu biasaya a'lele garringa iareka asamarai dodonga ri kampongta iamintu: Bungasa pasisambeangna hattua. Ebara'na maeng timoro iareka bambang alloi nanjari hatu pahosi iareka pasibalikangna. Ri maraengangnaya pale' padayami hatu baddo' lolo na hatu pao. Saba' punna pasisambeang hatu, batang kalenta anre' nakullei lacciri ampasirattangi batena anginga. Naia punna hatu paoi iareka hatu baddo' lolo biasana alohei katingalo. Na injo katingalo a'kullei a'palele ru'musu iareka langnga-langnga garring, iareka maengi battu ri ru'musu'na tau garringa na napasilele mange ri kanre-kanrena tau gassinga. Sanggenna tau gassinga sumpae' anjari to'i pole garring. Jari pila' lohei tau garring.

Na punna lanjagai ngase'i kabattuangna garringa paralluki antangkasi pammantang-angta, labbipaya katangkasangna batang kalenta. Ibara'na: Kitangkasi ngase'i sepa' a'rungang ereta ri anre'napa nabattu bosia iareka baloboa. Kisarring na kipa'se'rei garohonta nu'kullea narumungi katingalo simpadaya ahang pao, ahang loka, ahang baddo' lolo. Namaraengangnaya pole anre' na'kulle nitalasang mange-mange.

Na nuparallua nigaukang ri sesena katangkasang batang kalenta, ibara'na: Anrioki kaminang sikiddina pinruang siallo na aki kaluppai ammake sabung panrio. Kibunrului giginta punna maengki angganre iareka kaminang sikiddina pintallung siallo. Pakeangta parallui sangnging atangkasa.

Na punna kigaukang ngase'mo injo panjagaia ri anre'napa natabaki garring, na iaiji garringta aki ammantang anghoja-hojai iareka ammannyang ampina'-pina'na'i. Na punna injo anjari, parallu lacciri kierangi mange ri Puskesmasa (balla' garringa) iareka ampauangi pajamana kagassinganga.

Araki a'padai bohe-loheta riolo. Raung kajuji narammangangi kalenna tau garringa iareka nasuro assalaji ri sanroa. Injo pakunjoa anre'mo na'kulle nigaukang. Ara laloki "a'toli pammajaki na ulu batu" (tala allangngere pa'painga' iareka tala allangngere pa'suroang ri paranta tau). Na punna kikullemo anggaukang ngase'i injo pangngatorangna kagassinganga, a'kulle-maki nikua aleremi battu ri kadodonganga.

Garring nusuanga rie' iamintu: Ta'tai-tai na pirua' (muntaber); ahambangi nammore (flu). Punna garring ta'tai-tai na pirua' iami inni garring kaminang sanna' balana. Saba'na a'kullei taua akalabbusang ere ri lalang kalenna. Jari punna alohei ere ansulu' battu ri batang kalenta, injo parallui nisambe. Iamintu pannyambeinna: ere golla na ce'la a'pakunni: Angngalleki ere numaenga nipa'rere sikaca, nampa nipantamaki golla kassi' sitangnga saggenna se're se'ru', na nitambai bage appa'na se'ru' ce'la. Nampa nigaru' iareka nipasilau'i anggenna ancuro ngase'. Punna ancuro nipa'rangngami tau ta'tai-tai pirua'a. Na punna ammiruakiji nipa'kulingi pole aggenna aballo amminro pa'pisa'ring-na injo taua.

Sikua'ji injo lakupalabbaangki uru-uruna. Gassing intu labbi haji' naia maraenganga. Sultan - Sumalaya, Kajang

Ohang nupimbalia

Suang rie' rua iareka lohe tau iareka pole sibatu kampong sisala pangng-uppa. Sollanna rie' kasampangangta sisambe pikkirang, larie' ukirang niare' "Ohang nupimbalia." Sikali ambua' injo ukiranga na se're palakara nupimbali lanibicarai ilalangna. Sihali tau antungkului palakaraya injo angkua balloi na annaba na inni saba'na. Sihaliang tau ambaliangi angkua injo kodi na sala na inni saba'na. Pabacaya to'pa a'kulle ampa'tappu'i anterea naare' annaba. Na sura' kareba nuntolai sallo' pabacayami a'kulle antambai pikkirangna to'ji. Taliang pangnguppata numaengamo nipantama' kipalante mae, mingka punna rie' palakara haji' nunru'ki nihoja kedde' tau nulambicarai, pau sai. Nuni-pantama'a iamintu numa'ring rie' pangnguppa pimbali na talia nunpirangai ri pammarenta iareka na ri Alla-taala.

Kunni mae rie' palakara nu'kullea nibicara punna niare' sirattang, ebara'na: Arisang, rie' haji'na na kodina; Ammake pupu' kimia ri kokoa

iareka na anre'; A'sikola samara iareka a'sikola ri nuta'tujua; Haji' iareka kodi punna rie' koperasi; na lohe maraeng pole.

Kipalantemi mae pangnguppata ri Yayasang Bulu' Kuuppa na kinanroi ri kantoro cama'ta.

Palakara nubungasaya kibicarai iamintu ri sesena pa'cicilang.

Pa'cicilang

—Apa haji'na a'cicilia:

Pangngare'na ipung Banong, sala se're padanggang ri Kalimporo Kajang angkua: "Punna a'ciciliki manna anre'pa naganna' doi'a nipahalli ri sesena nuniparalluanga, a'kullemaki ammake todo', manna mamam angkua riolo riboko iaiji nibanyara'na, mingka anre' to' isse' nasikali."

Naia to' isse' pangnguppata ipung Amir na ipung Aco' angkua: "Cobana ammalliki oto, na nibanyara ngase' memang ballinna, na'kulle anre' kummake oto sanggengku amate. Mingka sukkurua, ka nasaba' bungangku a'cicili na kummake todo' oto sanggenna alappasami."


—Apa kodina a'cicilia:

A'pakaco'mo' tana dokkong

Ri kamunnina anre' nasikidi tana tala a'kulle natimboi lamung-lamung. Sanggenna patanna nasalaimi kampongna, rie' a'lampa ri kotaya, rie' todo' a'lampa a'boja tana maraengang, rie' todo' a'lampa ansulukang kampong ibara'na ri Malaysia, na ri maraengangnaya pole. Punna pakunni taru'-tarrusu, kajariangna a'kullei labbusu pakokoa ri kampong-kamponga. Sukku' ballona kapang punna nihojai anu'kullea nigaukangangi tanaya na co'mo'.

Apa niare' tana?

Tana iamintu pammantangangna sikuntu lohena olo'-olo', lamung-lamung, tau, olo' nucaddi-caddia (*mikro-organisma*), na maraengangnaya pole. Injo tanaya a'lapi'-lapisii. Punna nikekei naung niitemi lapisii'na tanaya. Lapisii'na tanaya tallu lapisii', iamintu:



I. Lapisii' sukku' ratea (*topsoil*): tanja'na sikola' lolo, sikola' toa, iareka le'leng. Kapala'na ga'ra tallung pulo senti. Iami inni lapisii' tana co'mo', nasaba' lohe assi tana naballaki.

II. Lapisii' tana rahaya (*subsoil*): lapisii' tana raha labbi kapala na nusukku' ratea. Tanja'na labbi sinarai na *topsoil*, na kurang lohe assi tanana.

III. Batu-batu: Sikidiji assi tanana, biasa minto'i anre' apa-apa assi tanana. Inni lapisii' tana sukku' iraha.

Apa assinna tanaya?

Co'mo' iareka dokkongi lamung-lamunga battu ri assi tanayaji. Punna simbarang-barangi iangase'na buangngana assi tanaya, tantu co'mo'i lamung-lamunga, mingka punna pasibalekangna, tantu dokkongi lamung-lamunga.

Rupa-rupanna assi tanaya iamintu:

1. Assala'na nubattu ri anginga = *carbon, hidrogen* na *oksigen*.

2. Assala'na nubattu ri lalangna tanaya = *nitrogen, posfor, kalium, calsium, magnesium, sulfur*.

Iangase'nami injo pasileo' ilalangangna tanaya anjari assi tana. Pada to'mi injo pupu'a; sitoje'na assi tanaji nipasileo'. Naia lamung-lamunga assi tanayaji kanrena. Punna kurangi assinna tanaya, tantu pa'rei lamung-lamunga. Apa pa'cappakengna? Apa lanigaukang? La'lampaki ri Malaysia? Jaki rolo'!

A'pakaco'mo' tana dokkong.

Tanra-tanrana tana dokonga:

- ajapa'i (anre' nahoho)
- karangkoangi
- anre' natimboi lamung-lamung

Tana nunilamungia a'tarru'-tarrusu na anre' na niparakaii iareka anre' nanipainroi assi tanana anjari dokkong. Lanri kumanami injo punna lanipainroi assi tanaya, parallui nigaukang batena, iamintu:

1. A'lamung poko' kaju:

Poko' kaju sukku' balloa nilamung:

- lohe aka'na, kaddoro na lantang naung
- a'kullei lassiri natongko' tanaya
- anrampang raungna

Matu-matunna poko' kajua mange ri tana dokkonga iamintu, aka'na natahanggi assi tanaya, raungna alla'langii tanaya, iami injo na anre' nakarangkoang.

2. Ninangkalai:

Matu-matunna na ninangkalai nikellaii ta'kahuru. Punna ta'kahuru, a'kullei nataba anging. Sanggenna assi tana nabattua ri anginga a'kullei antama' ri tanaya.

3. A'deppo (*a'bedengang*)

Punna tana ta'tiling nihajuangi deppo nu'kullea antahangi assi tanaya. Mingka punna tana lappara, anre'ja naparallu.

4. A'tahuru garoho:

Garoho nu'kullea nitahuru iamintu:

- garoho balla', pada kanreang—ako samo palasti', bassi na iangase' nuanre'a na'kulle hebbere jappo'.
- tai olo'-olo'; ibara'na tai jarang, tai bembe na maraengangnaya pole.
- raung-raung, pa'kattangang, pa'gara-gajiang, lohe pole maraengangnaya.

Matu-matunna: Injo garohoa, sitoje'-toje'na rie' monena niare' *zat organik* na *anorganik* nubattu ri assi tanaya na a'kullei amminro anjari assi tana pole, punna jappo'mi.

Se're to' pangnguppa battu ri pung Rabi' ammantang ri Sapiri Kajang angkua: "Injo a'cicilia biasana anre'mo na'pada balinna punna nibanyara ngase' memangi." Pangngare'na, pa'pada ri hattunna maeng a'cicili lipa' na ri hattunna nabanyara memang, sisalana ballinna rie'ja sanggenna 10.000 rupia, na nangai to'i sanggenna 25.000 rupia. Na injo lipa' nahallia, padaji tanja'na siurang ca'na.

Rie' todo' angkua: "Nakke maeng a'cicili oto. Naia ri hattungku la'cicili, rie' memang nihaju iamintu nikua pasipatantang battu ri tu'pacicilia na ri tu'cicilia angkua: 'Punna narapi'i tallung bulang sitampe-tampe na anre' nubanyarai angkua injo otoa a'kullei kulle pole amminro.' Nahaji' niisse'na angkua injo angngeranga oto biasaki natuju lurang, biasa to'i nasala taua, siurang pole biasa to'ki nataba nikua kacilakaang."

Jari apa nakua injo ipung Uddin: "Punna anre'pa sanggenna, ammari-mari samako rolo' ammake, manna ribokopi intu ammakejako punna rie' mintodo'ja dalle'nu." Nursalam KJ

Hattu sukku' balloa a'tahuru, iamintu ri hatu pammula timoro. Kapala'na ga'ra tuju senti ri bahonna tanaya.

5. Nihebbesi EM4.

Rie' ri tokoa nibalu' nikua EM4. Monena EM4a iamintu olo' caddi-caddi (*mikro-organisma*) anre' nikullei angngitai.

Matu-matunna EM4a; a'kullei napan-sulu' assi tana nurie'a lalangangna garo'-garohoa.

Batena nipake EM4a:

- nipasileo' ere, pasimbarangngna: 1 bageang EM4: 15 bageang ere.
- nihebbesiangi. Sukku' ballo punna karahie'i.

6. Nitongko'i.

Pa'tongko' sukku' balloa nipake iamintu palasti' a'kullea natarrusu sinara mata allo. Punna a'ra'ki atutu, a'kulle to'ji raung-raung.

Matu-matunna na nitongko'i iamintu, nikellaii EM4a lassiri napan-sulu' assinna tanaya battu ri garohoa. Nasaba' injo olo' caddi-caddi (*mikroorganisma*) nurie'a ri EM4a, anre' nakullei anjama punna natabai anging.

Tette' salapang ri ele'na kiasai ere bahonna palasti'a. Inni nigaukang allo-allo (ri hatu timoroa). Punna turungmi bosia (hattu bara'mi) nihungkarami pa'tongko'-na nanampa ninangkala.

7. A'lamung ruku' *kacang-kacang*

Ri maengnamo ninangkala, taniapa lamung-lamung a'kiasselea nilamung. Mingka lamung-lamung salaya. Sukku' balloa iamintu kacang-kacang arengna. Pa'pada nalamunga *Andoronemen* (gattaya) ri Balanriri.

Matu-matunna, ri aka'na kacang-kacanga rie' ammantang olo' caddi-caddi sanna' (*mikroorganisma*) nu'kullea angngallei assi tana nummantanga ri anginga, arengna: *nitrosamonas, azotobacter, clostridium* na lohe pole maraengangna.

Punna ganna'mi sitangnga taung umuru'na kacang-kacanga nila'la'mi, na nipa'se're ri kalibbonga. Nampami pole kinangkala. Punna rie'mo a'kulle kiitte sisalana ri hattunna bungasa na ri maengnamo nigaukang.

Salama'ki anggaukangi.

M. Ishak, Guru Biologi, Bulukumba

Apa kaminang parallu ri sesena sura' kareba basa Konjo? Iamintu sollanna iangase' bonena niukiri ri tau Konjo aggenna gitte to'ji anjari patanna sallo'.

Lohe kareba ri linoa inni, mingka nutojeng-tojenga nimirasai tunggala battu ri gitte, iamintu karebanta to'ji. Ibara'na kareba ri sesena kalassukang ana', pa'bakekaang iareka pa'tompolang, pa'sunnakang, pa'kalombaang, pa'tammakang sikola (TK na SD aggenna sikola tinggi sanna'), pa'buntingang, kamateang, na maraengangnaya pole.

Pa'tujungku lanipantama' karebanta na simpada nukibacaya iraha inni na ri lahara tuju pole, iamintu nipasimmaraeng ta'se'rea buwangang kareba. Karebanta nukibacaya ri sura' kareba maka se'rea inni, mallingmo

anjarina na anre' nasangka'. A'pakua'mi injo ka hatangi angnguppa kareba kamua inni punna talia tappa' battu ri numpisa'ringiai! Sibalekangna, lomo niuppa punna kipikatui karebanta.

Biasa arengji na tanggala na pammantangang nipantama' anjari pa'nassaang nu'kullea nibaca. Mingka punna rie' kareba nutala biasa, ebara'na tukunre mae sibali tubattu-battu, iareka sampulo tau nisunna', na maraengangnaya pole kipa'nassaji. A'kulle todo' kipantama' poto.

Pakunni batena punna rie' kareba: Kibonemi raha mae (iareka kiukiri mamii ri karattasa) na kipakunjoi ri kantorona pa'sambena pa'cama' (sekcama), nampa lanialle ri tunisuroa.

1. Arengna tu'tanggung/tu'pau?
2. Apa anjari (nianakang, nisunna', tumate na maraengangnaya pole)?
3. Sikuranna?
4. Arengna tau nunibicarai?
5. Buru'ne iareka bahine?
6. Amuru'na?
7. Pammantangangna (antama' to'i kacamatang, desa, dusung)?
8. Arengna tutoana, punna kalassukang na maraengangnaya pole?
9. Arengna tutoana buntinga na pammantangangna pole rua-ruana?
10. Pa'nassaang maraenga.

Tau Konjo Beru Abunting

Herlang:

Tugondeng:

☞ **Rostati** ana'na Sangkala na Rante, **Lassanru**, sibuntingi **M Rusli** ana'na Basri na Sabombong, **BontoSura**, 3-9-2003

☞ **Nurhayati** ana'na Sajuang na Jumaang, **Lassanru**, sibuntingi **Sariato** ana'na Wirio na Satni, 27-9-2003

Singa:

☞ **Rosmawati** ana'na Baco na Sarintang, **Saukeng**, sibuntingi **Usman** ana'na Lantara na Sitti, **Kec. Burau**, 6-9-2003

☞ **Jusmawati** ana'na Abd Wahab na Jawa, **Bonto Manai**, sibuntingi **Amri** ana'na Tahiruddin na Nanro, **EkaTiro**, 24-9-2003

☞ **Endang** ana'na Hasanuddin na Rohani, **Tuhulolo**, sibuntingi **Ariandi** ana'na Naim na Syamsiah, 5-9-2003

Tanuntung:

☞ **Asriani** ana'na Hasa na Suriati, **Banyoro**, sibuntingi **Sudirman** ana'na Mappi na Rassi, 10-9-2003

☞ **Irma Surianti** ana'na Mappilong na Bau, **Banyoro**, sibuntingi **Syamsul Bahri** ana'na Zainal Abidin na Sitti Hawa, **Balik Papan**, 20-9-2003

☞ **Tina Astuti** ana'na Abd Kadir na Bombong, Kel.**Tanuntung**, sibuntingi **Ambo Tang** ana'na Sakka na Isa, **Bassiu**, 10-9-2003

Ana' beru ri Kajang:

Tana Jaya: Jalaya

☞ **Dhiwa Zalsabilah**, Bh, 15-12-04 07:30 ana'na Sudirman na Astriwati. Ampu maka salapangna Syurkati. Ampu maka sampulona nitajang nianakang ri Jakarta.

Anjamai namate

Baco', ajangna iRabo' na ipara'na Abd. Halim S. (bate desa Lembanna KJ), sikurang allo nipajama ri arinna lampakahaji'i jongki'na. Ri allo arabai, 22 Desember 2004, kabenranna a'pa' bajung tuka' nangkua: "Jingaa kusa'ring." Nipane haji'i ri arinna, mingka a'lampai pa'mae'na. Anre'mi puang Baco' kodong.

Tukang kajui, anre' namalla' a'bindoe' ri kuda-kuda ri rongona. Pila' toa, pila' nangai ammake masina. Ammentengi ri se'rinna lamari assele' jamaangna na numakkala angkua: "Itte sai alusu'na limangku."

Salapang ana'na sikalabini Baco' na Rabo'. Nutoaya rie'mi tallu ana'na. Nubungkoa a'sikolaiji ri SD. Tallu ana'na

Ri Tana Beru, ri kalurahang Sapolohe, rie' pa'pilajarang angngaji niarengi TPA Al Amin Guppi. Nuna-pakea a'pilajara bate sikolana SMA Guppi Bonto Bahari. Tau lohea nunaisse'a nikua TPA na GUPPI.

TPA Al Amin GUPPI limang taungmi ammentangna. Iamintu ri taung 1998 bulang karua, battu ri Suhaedah Kamal, S.Ag. mange ri pajama-jamana Irmag (Ikatan Remaja Mesjid Al Amin GUPPI) iamintu Syamsul Bahri, S.P. Sanggenna a'se'remi pajama-jamana Irmag lima tau ri Masigi' GUPPI ambicarai angkuai antere' kamua batena a'paenteng TPA.

Maing injo nasitujuimi pajama-jamana TPA iamintu Suhaedah Kamal, S.Ag., Syamsul Bahri, S.P., Arman B., Andi Warlina, dan Nurinah.

Taung bungasa ammentengna TPA lohe memangmi santrina, ka injo pajama-jamana tau lalang kampong to'ji nanu lohe tau angngisse'i. Nampa pole pammarentana sanna' todo' na situjuinna. Pa'karamula Pa' Lura sanggenna Pa' Bupati.

Pajama-jamana TPA kunni-kunnina ta'pinrai. Rie' nuansulu' rie' todo' antama'. Jari pajama-jamana kunni-kunni iamintu R. Suardi, S.P., Muh. Arif T., A.Ma., Suhaedah Kamal S.Ag., Karniati, A.Ma., St. Maryam, Surya Ningsih, Riswani dan Andi Nurul Fadillah.

Batena a'pilajara ana'-ana'a angngaji ri TPA tala a'pada batena tau riolota. Tau riolota punna a'pilajara angngaji a'lepu'i rolo' nampa tappa' a'pilajara ambaca Korang iareka na Juz Amma. Ri TPA bo'-bo' Ikra' napake, iamintu Ikra' se're sanggenna Ikra' annang. Na punna lassu'mo bacana ri Ikra' se're sanggenna Ikra' annang naisse' ngase'mi nabaca sibatu Korang. Iami injo na manna tala tamma' ri Korang bakka' santria a'kullemi nipantamma'. Assala'na a'kullemi lulusu punna niugii ri paugi niarenga Tim Munakiz Kabupateng.

Pintallungmi TPA Al Amin GUPPI a'patamma'. Na injo pintallunga tala maingpii nasakkai Pa' Bupati. Na tau toana ana'-ana' bakka' to'i nyahana na sanna' rannuna punna nipatamma'i ana'na.

Biasana pa'pada injo nullaloe iamintu ri acara pa'tammakanga, Pa' Bupati a'jojjo'i santri nunipatamma'a nampa nakuta'ng, siurangang andana nipa'jojokang. Nakua todo' kapang punna gurunna lampa'jojokanga tumaccana lanahojaanga. Mingka se're kasukkurang injo nullaloe tala maingpi rie' santri nico'ri pangngisse'na na tala angngisse' a'pihali, pa'karamula baca Korang, pa'doangang allo-allo, pangngumpu bodo, baca sambajang sanggenna aya' pileang.

Kedde' nico'rina pangngisse'na santri nunipatamma'a ri Pa' Bupati na tala angngisse' a'pihali, sanna' siri'-siri'na gurunna, nasaba' lohe tau angngisse'i, iamintu iangase' tau toana santri nipatamma'a, pajama-jama masigi', pajama-jamana BKPRMI ri kacamatang na battua pole ri kabupateng. Tantu Tim Munakiz sanna' todo' siri'-siri'na.

Iami injo na punna lanipatamma'i santria, nipileiji anu'kullea lulusu punna nico'rii. Nasaba' punna nico'rii na tala lulusu siri'-siri' ri urangna. Sala sikidi ammarii pole. Punna anre' saba' bulang lima inni taunga larie'mo isse' acara pa'tammakang ri GUPPI. Mingka nakullei kapang la'pase'rei se're kacamatang. Kunni-kunnina santrina TPA nututturua angngaji labbi kurang sibilangang anruang pulo. Manna injo lohe tua'ra' napantama' ana'na mingka nikua maingpi pa'roa'-roakanga bulang lima, ka kurangi gurunna, kurang todo' pa'sidongang.

Muhammad Arif T, A.Ma.
Tana Beru, BontoBahari 4/2004

PEDOMAN RAKYAT
sinungka'na 1 Maret 1947
Sura' Kareba nusukku' malling ri Sulawesi
ambarisallangii
pabacana
Sura' Kareba Bulu' Kuuppa
nusukku' beru ri Sulawesi
Salama' Taung Beru 2005

A'boja panrita a'gambara
Maccaki a'gambara? kingaii
a'patta? Biasaki a'panrala?
Sura' kareba Bulu' Kuuppa
a'boja tau kamua injo.
Antere'ki? Nipasi-
isse'ki kedde'.

ammantang ri Sabah, Malaysia. A'kulle nikua a'bilangangi ampunna iBaco' nasaba' nangai ana'-ana. Tanning

nyahana ri ana'-ana'a na alusu todo' lamarina ri tu'pasang.

Kareba pa'pagio' ri desa TriTiro

Ri allonna juma' tanggal 8-10-2004, ri maengnamo a'sambajang juma' taua, nai'mi kapala desana TriTiro a'bicara. Nanapauangmo rajja'na angkua: "Ri bangginna araba allaloo antama'i bahia ri kokonna ipung Ali. Naia lamung-lamung nurie'a ilalang, sikidipi na naputta ngase'i. Ri tangnga alloa pole antama'mi isse' ri kokonna iAmir. Napanraki ngase'mi isse' lamung-lamungna. Iami injo, na parallumaki angeokangi nikuaya ammurang."

Na nakua pole: "Inai-nai tau a'kulle ammuno, natanggongi nabanyara 20.000 rupia sikaju. Assala'na nierangi bottina ulunna iareka potina."

Ri allonna aha' tanggal 10-10-2004 namulaimi rajja'a ammurang. Tette' limai ri asara'na rie' ngase'mi amminro battu ammurang. Namassing naerang bottinna.

Sanggenna kunni-kunni kurang toje'mi nummanraki ri lamung-lamungna rajja'a.

Mardiati na Marwatiah
Ara, BontoBahari 10/2004

Pammarentana Bulukumba

Iami inni kareba kupabattuangi mange ri sesena ngase' tua'ra'a angngisse'i apa-apa injo nagaukang pammarentana Bulukumba na rie'mi injo angnguppa kahajikang mange ri se're pa'rasangeng siurang tau pantarang kampong. Nakuami injo taua pammarentana Bulukumba nagaukangi kahajikang lino na ahera.

Apami injo nikua kahajikang lino na ahera, battuangna pammarentana Bulukumba a'bajui silohe-lohena atorang siurang a'sare to'mi siloheang jamaang na napakahaji'mi katallasangna tau nummantanga ri pa'rasangengna. A'baju annorang na haji' nia'rungi anrai' kalau', sikola napakamaccai ana'-ana'na taua, a'rungang ere na napakahaji'mi katallasangna pagalunga, na ia pole a'baju to'mi pa'tarileang punna rie' tau garring. Sikua' lohena doi' nipa'labbusu mingka anre' namaeng nirekeng-rekeng nasaba' iangase' injo nigaukang ka anjari jama-jamaangna pammarenta. Na ia pole doi' nipakea anubattu ngase'ji ri taua ngase' nupuritia a'banyara sima. Iangase'nami injo nikuanganga ambangung katallasang haji'.

A'padaeng ngase'mi injo pammarentana Bulukumba a'baju to'mi jama-jamaang iami inni nikuaya a'pakahaji' panggu'rangi mae ri karaeng Alla-taala. Patang buangngmi atorang nihaju siurang pa'sambena rajja'a nu'cidonga ri DPRD.

Iami injo nikua *Perda* (atorang daerah) massing-massing lamoro tallu taung 2002 angngatoro angkuaya anre' na'kulle angnginung tua' na inungang maraeng nu'pakalippu. *Perda* lamoro rua taung 2004 nungngatoro nikuangang sakka' na sidakka. *Perda* lamoro lima taung 2004 angngatoro nikuanganga a'pakeang Sallang, battuangna nitongko'i batang kalenta natala ta'kaitteang rupanna batang kalenna nuniharanganga ri agamana Sallanga. Iami injo pole *Perda* lamoro annang taung 2003 nungngatoro a'bacaa and angngukiri bacaang Korang (*Al-Quran*). Larie'i se're hattu na anre'mo nama'ring ana'-ana'a antama' a'sikola punna tala naisse'i angngaji, anre' na'kulle nipa'nikka ri imanga ri turongo-rongoa, assalang tala nipakatianangji, ia injo asusa.

Apami injo nakua tau tabbalaya? Mae ngase'maki massing-massing ampakahaji'i na nigaukangmo apa injo nakuanganga pammarentana Bulukumba, na kisalama' mange ri sesena Karaeng Alla-taala. Drs. M. Daud Kahal, Humas Pemkab

**Pa'pihalinna
Tappu-tappua
ri h. 9**

- ◆ [Padang-padanga]
- ◆ [Lampu palita/sulo]

Pa'tulung mange ri ana'-ana' sikolaya

Ana'-ana' sikolaya ri SD 311 Luraya Tana Toa Kajang rie' pannunranginna battu ri pammarenta daerah iamintu ikkingna siminggua pintallungi nisare dumpi-dumpi pakaddorang, nammulai ri galasi se're allante ri galasi annang.

Mingka injo pannunranginna pammarenta anre'na iangase' sikolaya ri Bulukumba angnguppa. Ri kacamatang Kajangmo kalenna, na nampami tallu sikola a'nassaya, iamintu ri SD 311 Luraya, ri SD 110 Bunja Malleleng na ri SD 248 Balagana Tana Toa.

Na sala se're pangngare'na guru agamana SD 311 Luraya, iamintu Pa' Yusuf, angkua: "A'pulo-pulo taungma angngajara na nampangku allabasa pannunranginna pammarenta mange ri ana'-ana'a iamintu nikua pannunrangi

kanre, na iajia nangaija angngitte punna nikua pannunrangi kagassingang iamintu pa'sunti' mange ri ana'-ana'a."

Narie' todo' se're pangnguppa battu ri tau toana ana'-ana' sikolaya nakua: "Ri suka'na rie' pannunranginna pammarenta mange ri ana'-ana' sikolaya, lere to'i ta'pinrana ana'-ana'a nasaba', maka se'rena, akatambaangi puritina a'lampa a'sikola, na maka ruana, anre' to'mo napisa'ringi ta'laloi pa'rea punna nakaluppai angnganre ele' ri balla'na."

Iami injo se're kalompoangna isse' pammarentata mange ri ana'-ana'ta nunatabaya sikolanna pannunrangi pammarenta.

Nursalam 12/2004

Kasampangang anjama: paukiri

Sura' kabara **Bulu' Kuuppa** a'boja tau nu'kulle angngukiri na basa Konjo. Kasampangangna tau nu'kullea antama' iamintu napalantei pa'pau ri sesena nunjaria ri desana a'genna kacamatangna iareka pantarang pole. Nunihojaya iamintu talia tau numaccaya a'karang, mingka tau nusadia a'kulleang na a'pilajara a'karang. Ri maengnapa ga'ra sikura hattu nampa nipa'se're nijara ri sesena antere' pakua bateta a'karang. Iangase' tau nu'kulleanga a'karang lanisarei pa'rannu-rannu sikiddi iamintu doi'. Na ri sesena tau numaccaya a'karang iareka a'kulleang na ballo, rie' pasikapangang nipagaji sallo'.

A'pikatumaki sura' mange ri kantoro cama'ta na kipau arengta na pammantangangnu, na apa kasabbiangnu iareka pa'tujungnu a'karang. A'basa Konjomaki.

Rupa'na
angnguppa
ngase'ki nukaminang
haji'a ri tallasa'ta
ri taung beru inni
2005

Sikurayapi isse'?

Pa'tujungna sura' kareba **Bulu' Kuuppa** lansulu' pingngappa' sihulang. Manna mammo nimirasai, anre'pa na'kulle. Nukibacaya sitaungmi angngannang bulang nipa'sadia!

Rupa'na a'kulle sura' kareba **Bulu' Kuuppa** inni ansulu' bulang-bulang rolo', nampa pinruang sihulang, nampa ri bokopi isse' pingngappa'.

Battu ri gitteji! Apa injo nukukuaanganga? Toje', battu ri gitteji na pakunni: nuniminasia ukirangta na karebanta na karangangta. Punna anre' battu ri gitte, anre' todo' bonena. Punna anre' bonena, anre' nipansulu'.

Angngukirimaki na kinaro assele'na ri kantoro cama'ta iareka ampikatui naung ri Mangkasara (Kotak Pos 1419, Makassar 90014).

Na kiu'rangimi inni: punna antama'mi karangangta ri sura' kareba **Bulu' Kuuppa**, nampa rie' pa'rannu-rannu nipalanteangki.

Rie' tau lampalei sura' kareba **Bulu' Kuuppa** ri appa' kacamatang na ri Kota Bulukumba pole. Iraha mae rie' arengna siurang pammantangangna na lamoro telepongna massing-massing.

Kota Bulukumba: Muchdar
Jn. Agus Salim No. 61
Kasimpurang, Bulukumba
0413-84366

Bonto Bahari: Amiluddin
Jn. Tokambang No. 15
Tana Lemo, Tana Beru
0413-85021

Andi Nuralang (Ramly)
Kantor Camat, Tana Beru
0413-85055

Bonto Tiro: Akhmad Nabu
Kantor Camat, Hila-Hila
0413-2588763

Herlang: Massaerang (Marsuki)
Saukeng, Singa
0413-2588652

Kajang: Nursalam
siurang Ifan
Kalimporo, Tambangang

A'ra'ki angnguppa sura' kareba Bulu' Kuuppa bulang-bulang?

Sampang ansulu'i isse' sura' kareba **Bulu' Kuuppa**, nipalante ri limanta kedde'. Pakunni bateta: pa'nassaangmi raha mae arengta na pammantangangta pole. Nampa nikiring ri SKBK ri Kotak Pos 1419 Makassar 90014 iareka ninanro ri kantoro cama'ta iareka nipa'nassaang ri paerang sura' karebaya nurie' arengna irate.

Arengta

Pammantangangta (antama' to'i areng dusung, desa, na kacamatang)

Pa'nassaang maraeng, ebara'na "balla'ku ri bokoangna SD 2736" iareka "ninanroanga na nibanyara ri kapala dusung Ere Dabung."

Bunga'-bungasa'na punna kitarima sura' karebata **Bulu' Kuuppa** kibanyara memangi 2000 rupia. Ri bokopi mae punna ansulu'mi pingngappa' sihulang **Bulu' Kuuppa**, nampamaki a'banyara bulang-bulang.

Batattana beru mange ri biring kassi'a ri Ara

Annoranga mange ri biring kassi'a ri Ara nuhaji'mo. A'kullemi na a'rung oto sanggenna lante mange ri biring kassi'a. Na injo biring kassi'a ri Ara kassi'na sanna' putena. Lasingkamuai putena karattasa nunipangngukiria inni. Haji' sikali nihaju panranu-rannuang.

Mingka injo a'rungang bakka' rie'a ri kunni-kunnina, toje'i angkua batattana nunigala-gala siurangang alusu, mingka sanna'i a'lengkona na sanna' todo' tabbingna. Nasaba' nunipa'bajuaia batattana tobiri lantang na lohe batu bakka'.

Kanara sanna'na lohe tua'ra' mange ri biring kassi'a ri Ara, a'sannang-sannang,

mingkaka malla'-malla'ji angngittei annoranga iareka mambaraiji bulunna nasaba' kamua injo na tanja'na annoranga. Na toje' rie' mantodo' kajariang oto a'dabbung ri annorangang injo.

Iami injo na Pa' Bupati Bulukumba a'suro baju annorang beru mange ri biring kassi'a anu haji'a. anre' nasanna' tabbing siurang pole anre' todo' nasanna' pa'lengkoangna.

Na kunni-kunni injo maengmi nipakarammulai, lalang pa'suroangna Pa' Bupati. Injo batattanaya maengmi nibela' borongna ri tau tabbalaya ri Ara na gotong-rojong. Kamaengangna rie'mi ri pammarenta, nasaba' ongkoso'na namaengi sanna' kajjala'na.

H. Abdul Hakim Ara, BontoBahari 10/2004

(pa'tarrusang Masigi' battu ri lahara 10) Amerika). Taliaji pa'dakkaang bangkengna, mingka inni pole: pa'dakkaangna pikkirangna nu'pakata'bangka. Annang bo'-bo' maeng naukiri ri sesena agama na hukkung na katojekang massing-massing rupa tau (HAM). Manna rie' sampulo antallu ana'na na labbimi tallung pulo ampunna, hajikang gitte ngase' anjari pa'tolana ri sesena pikkirang nulantang na panggaukang haji' nuluara. Naare'i kalenna tu'pilajara situntung tallasa'na.

Iami inni tutoata H. Mustamin dg Matutu a'kullei kedde' nipinahang tau Kajang nurie'a ri Mangkasara iareka ri maraengang kampong, nanisare dalle' ri Karaeng Alla-taala amminro ampakahajiki kampongna.

Syurkati KJ 12/22/04

Lamungang PANILI

Rie' se're lamungang nikua panili a'kullei nilamung ri kampong-kampongta. Mingka injo punna nilamungi ri koko nulerea, a'kulle to'ji ri ampi' balla'a, ka ambani-banina nijagai, nasaba' punna angngallei tangnga pa'nikka, biasa tala ambuai. Mingka punna lohemi a'lala' a'kullemaki a'balu' ta'sikidi batangna lolong raungna rie' ta'sampulo lima senti.

Batena nilamung nangai tana hambang, kaminang ballopa isse' punna tana dinginga. Anre'ja nammake hatu pammuppulu, punna narapi'mi pambuana ambuami taru'tarrusu, toa to'pi nanampa nialle. Nulammanrakia olo'-olo'ji biasa angkanrei. Anre'ja niparakai, anre' to'mo isse' nipupu', mingka punna mange nihoja parallui nipa'bunting ka tala bua to'ji punna anre' nipa'nikkai iami injo niare' jamaang tau kuttua.

Megawati, Jannaya KJ

Table with 3 columns: Date, tette, tinggi. Rows include dates from 28 Des 2004 to 2 Jan 2005 with corresponding times and values.

Inni kuera; injo kuhoja

Kuddeka rie' koko a'ra' nipa'pitesangang/nipasanra iareka rie' tau a'ra' annesang/annyanrai, sirattangi nipantama' a'ra'na ri Bulu' Kuuppa. Punna rie' motoro lanibalul' iareka na pete'-pete' lanihalli, sirattangi nipau ri sura' karebaya inni.

Kuddeka rie' tau a'ra' a'parampe tau ri balla'na iareka rie' ana' sikola a'ra' a'rampe, sirattangi nipau ri Bulu' Kuuppa. Punna rie' sopiri oto tere' nihoja iareka kassi' nibalu', sirattangi nipantama' kaparalluang injo ri sura' karebaya inni.

Pakunni bateta: Kiukirii nukieraya iareka nukihojaya, antama' to'i arengta na pammantangangta nampa kinanro ri kantoro cama'ta. Ri taung inni su'rung tanggala se're Maret 2005 anre' ki'banyara punna sikalijaki a'pantama'. A'kulleang saki.

Apa Ampakaburassingangki?

Gara-gara rie' pa'sabakeng nutala biasa, iami injo na burassinganga mallingmi niare' taliaji sangga pa'geo' batang kale. Lohe buangang pangnguppa na cari'-carita riolo ri sesena burassingang, nanaare' rie' battuangna.

Sintoje'na, burassinganga iami pa'geo' a'pansulu' nyaha battu ri ka'murunga na babaya. Burassinganga iami pa'geo' tala nikulle antahangi, na anjari tala situru' a'ra'ta. Injo burassinganga anjari gara-gara ta'seleng-selengi cappa'na ura' pa'pisa'ringna bukkuleng nipisi'na ka'murunga. Nutala biasaya, iamintu burassinganga a'kulle to'i anjari punna ura' pa'pisa'ringna mataya nahilo-hiloi sinara.

Pa'paseleng-seleng numpanjariki burassingang a'kullei gara-gara amboro bukkuleng nipisi'na (ahang lasunanna) ka'murunga, kamua injo anjari punna rie' garring ore; a'kulle to'ki burassingang gara-gara rie'na antama' ri ka'murunga; iareka a'kulle to'i gara-gara rie' ansa'ringki. Injo burassinganga iami batena batang kalea ampansulu'i anging/nyaha bajung lallap-pasangi apa-apa nu'paseleng-selenga.

Manna kamua injo, nampa riolo na riolo, nasikuta'nang taua ri sesena burassingang na ri sibatu lino burassinganga niare' se're tanra. Ri sesena tau Yunani na tau Roma na tau Mesir angngare'i burassinganga se're pa'pa'tutu ri nubalaya.

Biasa tau angkua "Puanga ambarakkakiko" ri maengna rie' se're tau burassingang. Anre' niisse' apa pa'sabakengna, mingka riolo tau Roma naare'i punna burassingangi taua a'pansulu'i beded' sumanga' nukodia. Iami injo na tau rie'a kunjo langkua ngase'i "rupa'na haji'-haji'mako" ri maengnamo burassingang taua, na'minasa sihali sollanna a'kulleangna a'pansulu' sumanga' nukodia anjari toje'i.

Tau nummangta ri nukasino-sinoiji angngare'i punna burassingangki iami tanra a'biringmaki mate. Gara-gara injo na punna rie' tau burassingang, lanapangkuaii "Puangami lantulungki." Lantarang tau burassinganga injo rie'i ilalang bala.



Hattu boso' na hatu esa'na ere tamparang

Lohe todo' ri sikuntuta tau Konjo a'lopi, sitangnga anjakkala juku' na sitangnga angngerang apa-apa mae mange. A'ra'na sura' kabara Bulu' Kuuppa anjampai tu'lopi todo'. Punna anre' ammolongi lanipantama' pa'nassaang sikali ta'tuju allo ri sesena hatu boso' na hatu esa'na ere tamparang.

Kunnimi inni rie' pa'pa'tuju kupiitangki, bara' rie' matu-matunna ri gitte tu'lopi. Punna rie' matu-matunna, kipau sai. Punna pale' anre', nipela' memangji.

Table with 3 columns: Date, tette, tinggi. Rows include dates 27 Des 2004 and 28 Des 2004 with times and values.



Ukiranga injo sumpae' nialle na nipakasirattang battu ri bo'-bo'a "Aku ingin tahu"

Lipanga na Kalumeme

Riolo anre'napa nasanna' lohe bua'-buangangna anungngokko'-ngokko' ri linoa, a'se're ngase'i anu'kullea angngokko'-ngokko' nammanraki lasiitte-siitte ngase'. Padayami ulara le'lenga, kalumemea, lipanga, to'roa lohe pole maraengang.

A'kuta'nangmi kalumemea nakua: "Inakke lampungkahai pa'siitte-siitteanga inni, nasaba' inakke kaminang ammoso punna angngokko'a." Nakua ulara le'lenga: "Anre'pa niisse'i." Nakua: "Kau, pung lipang?"

Nakua: "Anre' to'pa niisse'i angkua lanasaurua kalumemea." Langase'na nurie'a injo sikuta'-kuta'nang ngase'i massing nasullei ngase' kalenna ammoso punna angngokko'i. Nakokko'na taua matena. A'kuta'nangmi to'roa nakua: "Kau, pung ulara, punna angngokko'ko ante'i sikua' mallingna na'kulle mate taua?"

Nakua: "Kaminang mallingmi injo sibangngi siallo." Nakua: "Elele, lammanrakiko intu." Nakua: "Kau, pung lipang?"

Nakua: "Nakke tala sanna'ji malling ia. Punna rapi' batemo ammarimi. Anre'mo nasanna' pa'risi."

Nakua: "Kau, pung kalumeme?" Nakua: "Sampang antama'i gigingku angka'i bulekanga. Tarubbu'na gigingku matena taua."

Naia nalangngere'na ngase'mo injo mange nurie'a a'se're nakua: "Apami inni ia pung kalumemea, nalammanra'-manraki tau linoa? Nampa geo'na tampoi, ia to'mo pole a'ra' lampungkahai injo pa'siitte-siitteanga."

Nakua: "Anre' kua'ra' punna tala nakke pungkaha, nantappukii." Nakua lipanga: "Nakke pungkaha."

Nakua kalumemea: "Bilang sai bangkengnu, karamengnu. Sikura?" Nakua: "Nakke anre' nalohe, kau lohe karamengnu, a'sabbu-sabbu kapang."

Nakua: "Nakke patang puloji angngappa' ia, intu lohe karamengnu na anre' na'katinting, nakke karamengku nutarang, anre' namoso mingka nutarang."

Sanggenna a'pakua' minjo pangngehaang kalumemea na lipanga. Injo maraengang a'pina'na' mami na'boja-boja, simbambangimi. Nakua kalumemea: "Nakke pungkaha."

Nakua lipanga: "Nakke pungkaha."

Mingka injo kalumemea matanna nupa'pada doang injo hattua, anu'bussulu matanna, anupeca' matanna. Sanggenna nabattui kuku' lipanga, nasaba' inni kalumemea tampoi. Nampa lohe geo'-geo'na pole kodi niitte; ia to'pa pole a'ra' pungkaha. Nakua: "Kau, pung lipang, punna angngokko'ko anrapi' bate lammarimi."

Jari nakua: "Nakke nomor se're, rie' anrapi' bate, rie' sibangngi siallo nampa kulle mate."

Nakua: "Kau, pung to'ro?"

Nakua: "Nakke anre'jaya numalling, nampa nakke anre' kumacca angngokko' nito'roangpa. Nakke nukunjo to'ja naung ri kalibbongku ammantangi."

A'pakua'mi injo batena pangngehaang kalumemea na lipanga sanggenna bacci lipanga, anre' nasa'ringi kalenna ampalumpaki haji' memang matanna nikara'musu pimbali-bali, hutami. A'pakua'mi injo kajariangna na sanggenna kunni-kunni kalumemea tala rie'mo matanna, anre' nangngitte punna a'dakka karambang kaleji. Punna kaju menteng narapi' a'lampa nai'i. Punna rie' antoleangi a'kalongkongi anghalukii ulunna nasaba' naare'i rie' lampeppe'i. Anre' to'mo na'kulle angngokko' ri taua nasaba' anre' naisse'i angkua tau inni iareka nu'nyaha inni kuuppa nasaba' hutami. Iami injo na'sabaki tampona kalumemea na nikara'musu matanna ri lipanga nahutam, anre'mo matanna su'rung kunni-kunni.

A'pakua'mi injo cari'-caritanna iareka rupamanna lipanga na kalumemea. M. Ilyas 1987 ri Kalimporo KJ

Pa'bica'-bicaraang Tallu Basa

Anggarisi

A: Hi, Ali, are you going to school?
 B: Yes, do you want a ride?
 A: Sure. What are you reading?
 B: The new newspaper **Bulu' Kuuppa** in our Konjo language.
 A: I've never seen that before. Is it any good?
 B: It's great. It has all kinds of interesting articles.
 A: Like what?
 B: Like news from around our area, births, deaths, marriages, good information about farming and health.
 A: That sounds interesting. Where can I get a copy?
 B: They are being sold at lots of little stores. Only 2000 rupiahs.

Malaju

A: Halo, Ali, Kamu mau ke sekolah?
 B: Ya, Kamu mau dibonceng?
 A: Tentu saja. Apa yang Kau baca itu?
 B: Surat kabar baru dalam bahasa Konjo, namanya **Bulu' Kuuppa**.
 A: Saya belum pernah melihatnya. Apakah itu bagus?
 B: Bagus sekali. Ada macam-macam artikel yang menarik.
 A: Misalnya?
 B: Misalnya, kabar dari daerah sini, kelahiran, kematian, pernikahan, informasi tentang pertanian dan kesehatan.
 A: Menarik sekali. Di mana bisa saya dapatkan salah satunya?
 B: Dijual di banyak warung. Hanya Rp. 2000.

(mingka se're pammahangang)

Konjo

A: EAli, a'lampako sikola?
 B: Io, a'ra'ko kugandeng?
 A: Toje'. Apa intu nubaca?
 B: Sura' kareba basa Konjo nuberu, **Bulu' Kuuppa** arengna.
 A: Tala maengi kuitte injo. Maka balloi?
 B: Ballo kalea. Rie' a'bu'a'-buangang nusirattang ri seseta.
 A: Ebara'na?
 B: Ebara'na, kareba ri sesena apa nunjari kunre mae, ana' nianakang, tau mate, tau a'bunting, na rie' pole kareba ri sesena a'koko na kagassingang.
 A: Haji' toje' injo. Ante'a a'kulle ammuntulu se're?
 B: Nibalul' ri antere'-tere' pa'gadeang, 2000ji rupia.

"Halo, Mister!"

Punna rie' tau battu pantarang Indonesia, na kia'ra' siurang bicara, apa lakikua? Punna bungasa siitte tau, aramaki tappa' angkua "Halo, Mister!" iareka "What's your name?" A'nassami tau allangngerea naare'ki tau kurang angngisse' apa-apa. Rannui tau battu pantaranga punna nudadaji na angkua "Hello" iareka "Good morning./ Good afternoon./ Good evening." Anre' nama'ring angkua "Mister/ Misses/ Miss" punna anre' nitambai arengna, gaci'na "Mr. Brown/ Mrs. Jones/ Miss Smith."

Ri bokoa, punna angngitteki tau battu pantarang, a'kulleangmaki rolo' sikali angkua: "Halo, Mister!" iareka "What's your name?" Maka rannui tau injo na haji' napihaliki? Nampa a'kulleangmaki angkua: "Hello" iareka "Good morning./Good afternoon./Good evening".

Ante' pakua batena pihali? Rannui!

KELONG BERU

Ammentengki situna
 A'sidongki kamase-mase.
 Bukkuru'na battua Amerika,
 Jarolli butta Sulawesi,
 Sikella-kella se're jabba' naruai.
 Muh. Nasir Ebu
 Ara, BontoBahari

Lohe tau ri sikuntuta maeng angngapele lohe pa'pau basa Anggarisi, ebara'na *house, mouse, louse* na maraengangnaya pole. Mingka anre' na'kulle a'pansulu' se're kalima' sangka'. Rie'mi kasampangang haji'ta a'pilajara basa Anggarisi ilalang pammakeangna. Sollanna rie' pannyorong langngapele, sura' kareba **Bulu' Kuuppa** langgakang pa'tandingang angngapele pa'bicaraang basa Anggarisi punna maengmi rie' sampulo pa'bicaraang. Inai-nai barani na lohe naapele, amminahangmi. Larie' pa'rannu-rannu nauppa tummuntulua lamoro se're na rua na tallu. Amminahangmaki.

Ballo kedde' punna iangase' ana' sikola ri sibatua tana Konjo amminahang. Punna rie' pa'bicaraang battu ri gitte iareka na battu ri gurunta, palante sai ri sura' kareba **Bulu' Kuuppa** na nunanro ri kantoro cama'ta.

Pa'pasang; Pa'panggajara nakellaiki a'pikkiri

Rie' se're kampong napammantangi se're kalabini, angnganakang rua ana' sangnging buru'ne. Injo ana'na napiara sanggenna maeng ngase' napa'batang tau. Ri hattunnamo lamate, napasangmi ana'na ruaya. Injo jama-jamaangna lapung tau toa iamintu a'balu'-balu'. Pa'pasangna lapung tau toa mange ri ana'na iamintu a'battuangi mange ri katallasangna ri lino. Nakuamo ri ana'na, "Punna matea sallo', ana', anre' maraeng kunanroangko pantarangangna pa'pasangji, iareka pangngajaraji ri kau ngase' ruaya. Anre' barang-barang lakuhokoi-angko."

Ri se'rea allo napacidongmi ana'na ruaya siurang massing bahinenna. Injo pa'pasangna tallu buangangi, iamintu:

- ◆maka se'rena: punna mangeko ri tokonu, jako natabai allo.
- ◆maka ruana: jako nakua a'singari.
- ◆maka talluna: punna ammalliko juku' pakalohei ulunna.

Ri matenamo lapung tau toa, injo ana'na ruaya massing ammantangmi ta'se'rena kampong. Jama-jamaangna lapung ana' iamintu a'balu'-balu', massing ammake toko ta'se'reang.

Injo lapung ana' toaya ri hattunnamo a'saraeng siana' lanap'rupami pa'pasangna tau toana, naallemi nasare ata' battu ri balla'na mange ri tokona. Punna a'balu'i nangai a'piinrang injoka pa'pasangna tau toana anre' nikellaengi a'singara, jari anre' to'mo nasingarai lapung pa'piinrang. Punna mange bahinenna ri pasaraya sangnging juku' cakalang nahalli, mingka pa'pasang angkua pakalohei ulunna, sanggenna lohepi juku' nahalli na'kulle lohe ulunna. Kamuami injo pangnguppna lapung ana' ri pa'pasangna tau toana sanggennamo labbusu balu'-balu'na. Iami injo najariangmo sorokahu.

Injo to' isse' lapung ari maraeng to' isse' pangnguppna mange ri pa'pasangna tau toana. Pangnguppna a'pakunni to' isse' ia. Punna mange ri tokona na anre'pa natette' lima ri subua ambaungmi battu ri pa'tinroangna, na'tarrusu mange ri tokona. lapa namminro punna tette' karuai ri bangngina. Jari anre' natabai allo. Punna mange ri pasara bahinenna ammalli juku' sangnging juku' caria nahalli, jari lohe ulunna. Punna a'balu' barang-barang anre' naa'ra' a'piinrang nasaba' anre' na'kulle a'singara,

pa'pasangna tau toana. Kamuami injo pangnguppna lapung ana' bungko mange ri pa'pasangna tau toana sanggenna lapung ana' bungko rie'-rie'mi iareka kalummannyangmi.

Ri se'rea hattu mangemi lapung kaka ri arinna a'pasicoco' pangnguppa ri pa'pasangna sumpae' nasaba' bangkuru'i lantarang pa'pasangna tau toana. Sanggenna sihuntulumi lapung tau siana', nasikuta' nangmo. A'kuta' nangmi lapung kaka mange ri arinna angkua, "Ante'i kau a'pakua intu mae, andi?" A'pihalimi lapung ari angkua, "Haji'-haji' nakke katallasangu, daeng. Rie' toje' nakua pambajikangna pa'pasangna tau toaya." Na a'pihalimo pole lapung kaka angkua, "Antere' pole kamua, na nakke kunni-kunnina asorokahua gara-gara pa'pasangna tau toaya?"

A'giling to'mi pole lapung ari a'kuta' nang ri kakanna, "Antere' to' isse' kamua kau pangnguppna, daeng, injo sumpae' ri pa'pasangna tau toaya?" Sanggenna nacaritami pangnguppna lapung kaka. Nakuamo lapung ari, "Salai nakua batenu ambattuangi pa'pasang, daeng." Kuami injo nanicaritaang to'mo lapung kaka ri arinna pangngalamang siurang pangnguppa mange ri ta'se're-se're pa'pasang, sanggenna nampa to'mo haji' naisse'na lapung kaka.

Jari memang intu nikuaya pau tau toa iareka pa'pasang biasai maraeng napau mingka maraeng battuangna.

Sikunjoji sanggenna inni caritaya, na lakutongko'mo. Bara' kamuaji apa na'kulle angnguppa nipa'gurui sumpae' ri gitte ngase' tau gassinga allangngere nikua pa'pasang tau riolo.

Taslim Hasba 10/1990
 Tanuntung, Herlang

Tappu-Tappu

- ◆Punna niu'rangii, anre' nierangi; punna nikaluppai, nierangi amminahang. **Apaya?**
- ◆Punna bangngii, labbu uhu'na, punna alloi a'kulu-kulu bebbe'i. **Apaya?**

Pattong Silasa-lasaya - caritana tau rioloa

Nakua patanna carita, riolo bede' rie' tau ri Jalaya, tau anre' niisse'i kabattuangna, anre' todo' niisse'i arengna. Iajia samara niarengangi angkua iPu'tamparang, ka ammantangi ri biring tamparanga, na jama-jamaangna anre' maraeng a'lampayaji ri tamparanga a'boja juku'. Naia napakea anjakkala juku' jala.

Rie'mo se're allo namange anjala ri tamparanga nakua patanna carita angkua kunjoi anjala ri lembang keke, Daloba ri Tanajaya Kajang kamu-kamunnina. Konjo to'mi injo ri ampi'na balla'-balla' napammantangia. Na nabuangmo jalana ri tamparanga ka rie'mo naitte pada juku'. Maengi nabuang jalana mangemi naalle. Naia naengka'na jalana anre' apapa juku' naalle, mingka pattongji silasa-lasa naalle jalana. Saggenna napela' injo pattonga. Nampa isse' nabuang jalana, mange isse' naengka' jalana, anre'mo isse' nangnguppa juku', mingka iaji injo pole pattong silasa-lasaya naalle jalana. Napela'mi pole injo pattonga. Nampa isse' nabuang jalana, na tala maengi angnguppa juku'. Iaji injo pattonga sangnging naalle jalana. Ngingiriji pakunjo nakuamo naha-nahanna, "Ammari mama anjala, iamo inni pattonga kuerang amminro ri balla'ku, kulle kapang rie' matu-matunna punna kuallei, ka sangnging iana naalle jala."

Lantei ri balla'na nananromi pattong silasa-lasaya ri kutapinna napasiurang kaju pa'palluna. Nampamo mange anjama jama-jamaang maraeng. Maeng to'mi napannoi ere gumbangna. Amminroi battu ri jamaangna, mangemi ri gumbangna langngalle ere lanapa'palluang, mingka ta'bangkai ka labbusui ere ri sabbonna pada rie' tau maeng anniri ere. Lampami angngalle poleang ere nampa mange a'pallu, na napannoi pole gumbangna ere. Maengi angnganre, maeng to'mi ammari-mari, lampami pole ri jamaangna. Amminroi battu ri jamaangna, mangemi isse' anghojai erena ri gumbangna ka la'pallui isse' kanre lanakanre punna bangngii. Ta'kalasami isse' nyahana ka labbusu-mi isse' erena ri gumbangna. Pakuami injo allo-allona, punna amminroi battu ri jamaangna sangnging labbusu'na erena ri gumbangna.

A'bojami akkala, a'ra'i naisse' apa sangnging ampela'-pela'i erena ri gumbangna punna nasalai balla'na. Angnguppami akkala, attu-attui lampa ri jamaangna nampa amminro boko na'dikki-dikki antama' ri siringna balla'-balla'na. Battu antama' nalangngeremi rie' a'lappo' rate ri balla'na, tala malling nalangngeremi rie' pada tau a'dakka, nahoja-hojami, na naittemo tau a'dakkaya mange ri sabboa, mange anrio ri gumbang, tau lolo bahine ballo-ballo, pute bukkulengna, labbu uhu'na. A'parri-parrimi nai' ri balla'na namange napatanting injo bahinea nampa nakua, "Ikau pale' sangnging allabbusii ereku. Kubuntingimako inni ia ka anre' minto'ja bahinengku." Nakua injo bahine ballo-balloa, "Sabbaramaki, taliami intu masusa. Se'reji kuera ri gitte, punna ammuko embaraya na rie' kipa'cecceang ri nakke, tala nakke tea ri gitte, mingka igitte tea ri nakke, tangnga naolai pau silappa." Nakuamo iPu'tamparang, "Io, apa to' lakupa'cecceang ri kau na nusanna' ballo-ballonu."

Nabodoimi caritaya, jarimi nibuntingi bahine ballo-balloa ri Pu'tamparang. Sipammantangangmi ri balla'na anre' to'mo namminro antama' ri pattong silasa-lasaya. Saggennamo nisare dalle' na mana'mo bahinenna iPu'tamparang. Appa' ana'na iangase', mingka anre' ballo-ballo pada anrongna. Rie' a'kale bajo, rie' a'kaditili simbolengna, rie' a'sappa lilana, rie' atenta matanna. Nakua patanna carita iami inni ana'na iPu'tamparang ta'siara ri Kajang anjari bohe katurungangna tau Kajanga.

*** Labbuiji caritana **Pattong silasa-lasaya**. Sabbaramaki na kitajang sura' kareba maka ruaya, larie' tappusu'na lapung carita.***

Sitaungmi Cama' ri Kajang

Ri tanggala 29 bulang sampulo nullalloa narapi'mi sitaung sinungka'na ammentana ri Kajang iPa' Abdul Wahid Jalil iamintu niare' Cama' Kajang. Na injo Pa' Cama', assala kabattuanga rua sikalabini iamintu ri Kacamatang Bonto Tiro, na a'julul ana' appa' tau iamintu:

Maka se'rea buru'ne amuru'na ruang pulo allima taung, a'kulia ri Teknik Unhas (pangngisse'/ kacarad-dekang a'baju barang-barang sagala iamintu ri pa'guruang tinggi Hasanuddin). Maka ruaya buru'ne pole, amuru'na ruang pulo anrua taung, a'kulia ri Ekonomi (kaparalluang katallasang) Manajemen (pangngatorang) ri UNM (pa'guruang tinggi ri Mangkasara). Maka tallua bahine, amuru'na ruang pulo anse're taung, a'kulia Hukkung ri UMI (pa'guruang tinggi lalang kasallangang ri Indonesia). Maka appa'na iareka nikua ana' bungkona iamintu buru'ne, na amuru'na sampulo angngappa' taung, a'sikola SMA (sikola pa'tangngaangna ratea), galasi se're ri Bukukumba.

Injo Pa' Cama' Abd. Wahid Jalil, kunni-kunnina amuru'na rie' to'mi limang pulo anse're taung, namaeng a'kulia aggen nauppa Sarjana Sosiologina (kalabbiang pangngisse' tula'pakahajikia ri sesena tau tabbalaya) iamintu battu ri APDN (se're pa'guruang rate numpaissekii batena kapamarentaanga ri lalang pa'rasangeng) ri Mangkasara ri taung 1981.

Maengi injo pammulami anjama ri tana kalassukangna (Bonto Tiro) anjari kapala bageang (KASI) PMD (Pembangunan Masyarakat Desa

iareka pammentengang rajja' ri desa) iamintu pammula ri taung 1981 sanggenna taung 1989. Ri taung 1989 anjarimi pa'sambena pa' cama' (SekCam) sanggenna ri taung 1995. Ri taung 1995 nipalette'mi ri Bonto Bahari, mingka pada to'ji jamaangna iamintu sakku pa'sambe pa' cama' (SekCam) sanggenna ri taung 2001. Nampami nipalette' mange ri kotaya (Bulukumba) anjari kapala se're bageang Pariwisata (kantoro nungngatoroai pa'roa'-roakang iareka kabattuang tau lerea angngitte-ittei) sanggenna ri taung 2002. Ri taung 2002, anjari kapala se're bageang ri Bappeda (kantoro nula'pa'tantui pambangungangna kamponga) sanggenna ri taung 2003.

Pangngare'na Pa' Cama' Abd. Wahid Jalil, batena ammentana iamintu a'palece tau, mingka a'kulle to'i teresa punna rie'mi tangnga kamua iareka punna parallu. Nangai a'cidong ilalang ri bangkona kantoro'na nala'tarima tubattu; mingka nangai todo' ansulu' ri sikuntu tutabbala'na naparenta iamintu ri sampuloo ansalapang desa na lura, nampa naurang a'carita manna inai-nai. Siurang suang to'i nasuro pajamana ri kantoroa ansambeangi ansulu' punna anre' na'kulle ia.

Pa'tujungna Pa' Cama' Abd. Wahid Jalil tallu passala napakokang ammentana ri Kajang, iamintu ri sesena pangnguppaang doi' (ekonomi), pa'sikolaang (pendidikan) na maka talluna iamintu agama.

Ri sesena pangnguppaang doi' nakua: lohe doi' assele na hattu nipela'-pela' nasaba' anre' nakaati-ati tau. Pa'tujungna iamintu nipokokang



assele, nipakalohe kedde' aggen na' sahalang lohe todo'.

Ri sesena pa'sikolaang naisse'mi Pa' Cama' angkuaya samara tutoa a'kunrarenng iamintu lohe doi' parallu nibanyara. Manna suli' a'sikola kunni-kunni, rupa'na napahang taua angkua sinampe'ji kakalumannyangang nutala a'poko' ri sikola, iajia pila' lombo kakalumannyangang nu'poko' ri pa'sikolaang.

Ri sesena agamaya, pangnguppa'na Pa' Cama' iamintu haji' kariakang ri Kajang. Naisse'mi angkua rie' pasibaliangna agamaya na ada'a ri Kajang, mingka talia battuangna angkua se'rea annaba na se'reanga asala, mingka rua-ruanna a'kullei nipadakka. Ri beru-berua inni, desa Lembannami nipile ri pammentana nikaddoriang panggaokang agamaya, na ri lura Tana Jaya nipile to'i ri Pa' Cama' la'pakalohe sakka'na taunna. Mingka manna ruaji nipile, pangnga-a'rangna pammentata iangase'na niminasai puriti a'sambajang na a'sare sakka'.

Ri sesena palakara maraenga pakunni pa'pauna Pa' Cama':

—Ada'a rie' katojekangna siurang pammentaya. Rupa'na sipakataui.

—Kalambusang niajarang kedde' ri sikola.

—Tau Kajang andai nibeta ri inainai, iami injo na a'kulle-kulleangki ambetai tau maraenga.

—Sadiami tau Kajanga apinra, antama' to'mi ri sesena lampu na telepong, na manna Tana Toa ammulai to'mi apinra ta'sikidi-kidi situru' ada'na.

—Maka a'kulleji Kajang nipanjari rua? Tantumi, mingka ri bokopi isse' nasaba' lanipasure'u rolo' ada'a na pammentaya.

—Pasilololang gattaya? Batena Pa' Cama': talia anu hukkung, mingka iaji pa'samaturukanga.

—Ri sesena a'pa'ruaya Amma Toa? Nipabbiangmi rolo', ka massing rie' taunna, na ri bokopi na'nassa angkua se'reji a'parrang, mingka nuparallua kamunnina pa'samaturukanga, na minjomo a'bese'-beseri.

—Ri sesena kapala desa tappa' a'dalle' ri bupati: Tala angngurai, assalang cama' nipa'pauang.

Pasangna pa' cama'ta iamintu:

“Sipakataumako na nusipakahajiki. Ako sangnging a'bura-burai punna rie' maengko janji, pa'pada punna nakke pa' cama' a'janji tala maengi kusala.”

Rupa'na jamaangna Pa' Cama' Abd. Wahid Jalil ringang na lohe assele'na pole, na rupa'na salama'i ammentana ri Kajang sanggenna atappusui hattu pammentanaangna ri taung 2007 sallo'.

Pa'pilajarang a'karang bicara Konjo

Pinruangmi nigaukang a'pilajarang [lokakarya] a'karang bicara Konjo ri sikolana SMP ri tulampansulu' sura' kareba a'bicara Konjo, iamintu Yayasan **Bulu' Kuuppa**. Nubungasaya nigaukang iamintu ri SMP1 Hila-hila tanggala 12 Juni 2004, na kapala sikola, Drs. M. Bakri Akhmad ampungkahaii. Sampulo allima guru SMP siurang rua guru battu ri sikola maraeng amminahang.



Numaka ruaya nigaukang ri tanggala 13 Oktober 2004 ri Ara ri SLTPN2 Bontobahari. Situru' kapala sikolanna Drs. H. Hasan Dengi numminahang ruang pulo anse're tau sitangngana guru battu ri SLTPN2 Bontobahari na rie' todo' guru battu ri SD nuambani-bania. Nampa pole rie' todo' battu ri Kajang rua tau nulompoo a'ra'na a'pilajara angngukiri ri sura' kareba.

Iangase'na tumminahanga, sanna' lompona a'ra'na atinna allangngerei bicaranna tau a'sarea pa'pilajarang Barbara Friberg battu ri Yayasan **Bulu' Kuuppa**. Mallingna tallu jang na nauppa pa'pilajarang ri sesena nupoko'a punna ki'karang iamintu ampa'paisekangi taua. A'pilajara to'i batena anggaokang karangang nuhajja' na nulomo nipahang siurang pole batena niukiri basa Konjo sollanna na'nassa. Ruaji buangng karangang nasampang ampa'pilajari iamintu karangang nu'pageo'a

siurang karangang kareba. Rie' todo' a'bu'a'-buangng pa'pa'tuju na kasampangng a'pilajara bajung ampa'nassai iangase'na.

Ri maengnamo allangngere pa'pilajarang na siurang bicara ri sesena masing-masing tumminahanga a'kulleang to'ji angngukiri karangang. Rie' a'karang ri sesena kareba kampong, rie' todo' ri sesena carita riolo, palakara nu'pageo'a, na lohe maraengngana pole. Iangase' tumminahang na a'karang pole angnguppa sura' tamma'.

Riboko mae rie' a'pau ri sesena pa'pilajarang a'karang bicara Konjo angkua sanna' rannuna amminahang na lohe nauppa nu'pageo'i pikirangna. Lohe bedede' a'ra' a'karang poleang, na rupa'na anjari toje'i.

Massing-massing sikola SMP iareka SMA ri sibatu tana Konjo nikellaeng anggaokangi pa'pilajarang pole, assalang rie' ruang pulo tau nua'ra'a amminahang.



(SD kedde' amminahang ri SMP iareka SMA nuambania). Pikatuang sai a'ra'ta mange ri Yayasan **Bulu' Kuuppa** ri Kotak Pos 1419 Mangkasara 90014, iareka anneepong ri 0411-840807.

Syurkati, Kassi' KJ

Masigi' Mustamin daeng Matutu beru nipaenteng ri Kassi'



Sanna' rannuna tutabbalaya ri dusung Tanetea desa Lembang Lohe Kajang a'pammula tanggala annang bulang Agustus taung 2004 sipa'sambajang juma'ki ri masigi' Alfunqaan, iamintu masigi' nahajua Yayasan YasMatutu nunapupataya Mr. H. Mustamin daeng Matutu.

Sala se'rena tuhusengna Puang Ri Tabbuakang nianakang ri taung 1925, H. Mustamin mallingmo ammantang ri Mangkasara. Nanisare dalle' ri Paung Alla-taala na nahajui injo masigi'a nuongkoso'na nitassere lima bilangng juta rupia, siurang balli tana pammantangngna injo masigi'a.

Lompona 12,5 metere kali 12,5 metere antama' to'i lego-legona, na a'kullei nipake a'sambajang kulle kapang 400 tau. Masigi'a injo siurang tana pammantangngna luara'na sisabbu metere pada sulapa'.

Mallingna nihaju injo masigi'a kurangi ri sitaunga. Iangase' pa'kakkasa napakea siurang tau anghajuai nunapabattu ngase'

Yayasanga battu ri Mangkasara. Jari tutabbalaya ri dusung Tanetea tappa' ammakeji bahang.

Masigi'a Alfurqaan injo antama'i sala se're masigi' desa kaminang ballo ri Kajang. Na sitangnga tau angkua masigi' kaminang ballo ri sibatu kabupateng Bulukumba. Dapara'na tegele a'billo', rinringna pole, na rie' pannanroang bo'-bo'. Ere napakea buhung bor, na rie' se're pa'je'nekang buru'ne na se're pole pa'je'nekang bahine.

Tutabbalaya ri dusung Tanetea na kacamatang Kajang sanna' rannuna, na napangngeraang pa'doaanga ri Puang Alla-taala bara' a'kullei tautoata H. Mustamin dg Matutu nisarei kagassingang na nipakasempo dalle'na, nilabbuang umuru'na, na'kulleja napa'tarrusu napakaballoi injo masigi'a, pa'pada nanaha-nahaya.

Ri sikuntuta tau Konjo kulle kapang Mustamin sukku' lere pa'lampaangna (15 kampong, antama' to'i Balandu na (nipa'tarrusu ri lahara 8 kol. 3)